

國

朝

文

匯

國朝文匯乙集目錄

卷二十八

彭元瑞

號益樞江西南昌人乾隆丁丑進士官至協辦大學士工部尚書文勤有恩餘堂集

尚史序

送哀雅堂卓異回任序

戶部郎中劉君墓誌銘

湖北施南府通判姜公墓誌銘

蔣士銓

字心餘號藏園又號清客江西鉛山人乾隆丁丑進士官編修有忠雅堂集

何鶴年遺集序

劉氏重建五忠祠碑

贈兵部左侍郎墨潭周公傳

入祀昭忠祠鑑南吳公傳

杭州府餘杭縣知縣蘇公傳

明湖南總兵彝山周公墓誌銘

廣州府同知屏文魏公墓誌銘

十

八

八

七

五

五

四

三

二

一

一

贈文林郎孝子吟臺蕭公墓誌銘

十

張

洲字達舉號南林陝西武功人乾隆丁丑進士官浙江德清縣知縣有對雪亭集

王猛論

十二

王朴論

十二

屈蠖軒記

十三

江舟出峽記

十三

探靈巖記

十四

石砭城南石砦記

十五

吳紹曾

字皮位號魯也浙江秀水人諸生

烈婦鄭氏傳

十六

袁貞女傳

十六

程大中

字奉時湖北應城人乾隆丁丑進士官教校有在山堂集

宋太祖論

十八

洞庭濯足圖說

十八

藥村詩鈔序

十九

陸筱飲詩集序

十九

通逸堂詩稿序

二十

陳

謨字汝師號拙修浙江平湖人貢生著有拙修文稿

論名上

二十一

論名中

二十一

論名下

二十二

龍湫山人像贊并序

二十二

薛著廷

字退思號補園陝西洛南人乾隆丁丑進士官編修

邈雲三編序

二十四

南林張君墓誌銘

二十四

國朝文匯乙集卷二十八

尚史序

彭元瑞

立乎今日以成尚古之史其將能乎曰奚其不能也羣經皆古聖人之事諸子百家去古未遠各有譏述取而薈之以成一家之作而非一家之文也今有商彝周敦父癸之尊史克之鼎岢嶇之碑石鼓之字一器一丈之流傳好事者不惜挾異剔隱集以為錄而謂其大者而懸置之可乎太史公作史記所採古書今什不存五且烏知夫後此數千年其佚不更倍於今之距漢乎憚其所不能而張其所能無惑乎古之日湮也然則羣經尚矣諸子百家其可盡信乎今有垂髫弱冠者聞齒豁戴白之叟語我生以前事又或出塞航海萬里來歸與不出閭巷之人談其身所涉歷聞見雖其言不無誇誕然理之可信者信之否亦以資博洽俟考証云爾孔子作春秋所見異辭所聞異辭所傳聞異辭疑者闕之未聞不錄也矧大書分法作者之意具在矣若是則是書之作於古人何若司馬紀五帝小司馬補三皇皆大概也皇王大紀綱目前編紀世而已古史意存乎正龍門而非其自作路史博矣或不馴且不純乎史近代輝史則紀事之體今是書也紀表志傳一從史例釐然秩然以其意為論贊悉軌於正令讀者貫穿三古其文可誦其義可法而其大者於古帝王所以治國平天

下之道。若天文律呂之奧。疆理井田之大。兵刑之繁。氏族之細。咸具諸志。張皇揚厲。損益升降。觀者如揖讓。皇古之世。而慨然知二帝三王之可復。此則尚史之所獨也。

送袁雅堂卓異回任序

予友之令於蜀者。得循吏二人焉。曰袁雅堂。曰朱秋漪。予家距雅堂所居二十里而近。雅堂距秋漪二十里而遙。居相近也。予長於雅堂兩歲。雅堂長秋漪三歲。年相近也。予與秋漪同補博士弟子。與雅堂同舉於鄉。又同成進士。出處相近也。洎兩君綰綬。坤維。予屢東尺南。脰不相見者動輒十年。二十年離合之感。往來於懷。前年秋漪以卓異來。今年雅堂又以卓異來。紅塵白雪。鑪寒鐙灺。斗室坐而縱談者。各月有餘。而三人者。鬚髮俱白矣。雅堂為人開朗而中醇。秋漪簡默而內敏。其好修守介。有所不為。則一。此其於今之所謂能吏者。宜皆不中其科。而連三年以最報。可以慶兩君所遇之淑。而蜀之大吏。能察其下。其取人得所好之正也。予問雅堂。今中外皆言蜀州縣無虧空信乎。曰有。打箭鑪之商稅。歲不及額者二千兩有奇。各州縣公蠲而償之。嗟乎。此於他處百之一耳。而尚何言。雅堂語予。蜀之山水。灌口引江。以為渠口之所入。醜之鬻之。達於二十七州縣。泱泱汨汨。與塗俱轉。如畫中樹。一幹所拆。千條萬柯。漸遠漸支。數不可紀。其山多泉。疊壑累塍。坡陀上下。彌月不雨。決圳放水。三世之農。

家無龍骨。自比歲豐。盈四鬴之餘。泛江下輸。露積陳因。腐不可食。民豐而樂。故下吏得藉手以有成也。予曰。此誠長者之言乎。方今

聖天子勤恤民隱。為閭閻饗飮計者。截漕利運。平糶廣賑。至纖且悉矣。蜀得順天時。因地利。吏治之善。和氣薰蒸。以有此也。雖然。此天下之利也。古人有言。粟生金死。誠哉。江之為水。仁柔而宜稻。其力可以無不及。講積儲之地。求轉輸之塗。通其惠以均之。博其力以勸之。俾蜀之土不至穀賤而傷農。而天下之虞艱食者。有所恃以無恐。其亦有道乎。今之為官。僅及乎一縣。且暮而思之。陳之上官。本之於蜀。而溥之於天下。必有留意乎此者。於雅堂之行。書此以贈之。且以誌秋蒔。

戶部郎中劉君墓誌銘

公諱世寬。字匡宇。號幹齋。新淦人。曾祖鎮隆。祖鼎。邑庠生。父學瀾。康熙癸巳恩科舉人。山東高密縣知縣。兩世以公貴。贈如其官。公以諸生中乾隆甲子科舉人。乙丑成進士。初任浙江淳安縣知縣。調繁黃巖縣。海疆期滿。內擢工部營繕司主事。丁母憂。服闋。補虞衡司主事。晉都水司員外郎。郎中。監督寶源局。管街道廳。授山西道監察御史。巡西城會。

上加意民事。思得練習材。

敕部取京職中由知縣者十四人引

見以公為廣東

惠潮嘉兵備道旋以父老終養歸。既卒事再補惠潮嘉道大吏以不勝任告以同知用自請改京員授吏部文選司主事。晉稽勳司員外郎。戶部山西司郎中。與乾隆五十年千叟宴五十五年。公年七十一。乃告歸。歸十年。以嘉慶五年九月二十日卒。明年某月某日葬於某山。子七人。佳珩。邑庠生。佳琦。四川達州知州。加知府銜。佳璿。佳琛。俱太學生。佳珙。佳珮。佳珍。邑庠生。女四人。孫男七人。女四人。曾孫男三人。女三人。公令淳安縣民潘景霞娶姜氏方始。以適妒出為錢正公妻。七月而生子九高。付徐乾亨妻乳之。四歲正公無子以為繼。而遇之虐。九高漸長。姜氏以告。遂竄依景霞。正公控以誘逃。且謂所繼乃乾亨子。姜氏袒後夫詞翻異。官莫能理。公履任集鄉民於城隍廟。禱而瀝血。先之以乾亨九高不凝。繼以景霞姜氏九高則凝。事乃白。及令黃巖有王世璣者。聘其姑之女符氏。其母與姑閱。亟悔婚。姑之夫賜履諸生也。鳴之學使者。以女終身不嫁立狀而罷。既而私以字趙氏。世璣鳴之。公引符氏置對。藏雖自刺。公私度曰。終身不嫁非人情。然女實屬王氏矣。自刺為父解也。令還歸而陰命昇之王氏女。固王出也。賜履以世璣奪女走告。公笑曰。徐之逾年符氏生子而世璣亦為諸生。公屢任善政。甚夥。此二事兩縣到今傳之。高密公之舉於鄉也。與先光祿公同年。公與先仲兄同為浙江知縣。又與予同仕於朝。幾二十年。其歸也。詩以送之。有

曰。兩世知交。分袂遠卅年。仕宦典衣歸。嗚呼。可以知公矣。佳琦來請銘。不獲辭。銘曰。氓之蚩蚩。情如縈絲。疇為之父母。而一不知。我得其情。彼不得盡其辭。胡神於治縣。而詘於監司。抑大吏實尸之。操事瘞詞。以為吏師。

湖北施南府通判姜公墓誌銘

明有直諫之臣。曰萊陽姜先生某。以言事指權貴。觸怒瀕死。國亡前一月。始謫戍宣州。滯寓吳門以卒。終葬戍所。子孫或為宣城人。或為吳人。先生生實節。實節生本任。本任生贈榮祿公。公諱某。字念劬。號野鶴。少受業何義門之門。補金山衛學生員。歸籍萊陽。食餼援貢太學。與修大清一統志。成議總得廣西太平府思州同知。在任十年。猛人愛之。攝思陵上恩二州知州事。治業牘精勤。上思某甲出賈歸。為人戕於水。莫知殺者誰也。久不決。公下車。廉無賴乙。是年自他挾千金歸。好語致之一見曰。此殺人賊。目動色變。遂吐實。尋晉遷山西朔平府通判。分治甯遠鎮。如劇縣事。立辦旋以裁缺。再任施南。治江防有功。年及格。致仕歸。公女弟適申氏。隨夫任雲南。卒公萬里歸其喪。萊陽先生遺產在故里。公歸。族人返其田。公推為祭產。蓋其細行猶急名義。輕財如此。公生於某年月日。卒於某年月日。壽八十有二。贈如子官。所著有紅鷺館詩鈔。六松軒制藝若干卷。配贈一品夫人畢氏。浙江錢塘縣某人女。生富族。

益具甚豐。及外家落。乃悉返之。故能佐公為廉吏。以某年月日卒於思州官舍。距生某年月日。壽六十有一。時子晟方困諸生。洎公卒。晟官刑部郎中。浸通顯。越十有五年。晟為刑部左侍郎。始陳情乞假歸葬。荷。

上恩。允。光榮誠信。備禮有加。以某年月日。奉公及夫人合葬於某山。首某趾某。子三人。長世昌。先卒。次即晟。次某。孫六人。瑞與晟同官二十年。讀明史。知公先世事。屢持吳門使節。裝裱二姜先生祠下。故為之銘曰。

方先生以直言繫獄。夜半禁中出片紙。幾死。桎梏。父閭門殉難。乞歸葬不得。何其酷也。公雖未大顯。隨地能自表暴。及侍郎乃以治刑為聖世卿貳。保世滋大。蓋公慶之篤也。易曰。天地閉。賢人隱。詩曰。王國克生。惟周之禎。夫豈惟一家。抑時各有所屬也。

帝鑒烏私。允臣牘。若堂者。阡後致福。我作銘詞。無滋慙。

何鶴年遺集序

蔣士銓

乾隆乙亥。予以假閒居南昌。于破寺壁間得鶴年詩。讀之驚喜欲絕。跡而訪之。君方授徒佑清寺。伏一几。亂書繞其身。纖瘦濃眉。目光睒睒如電。兩顧崢嶸。儉下露齒。肩聳如山。白眼上視。吟哦自得。冷峻之氣。颯颯然。客自來去。無周旋。人不欲知。鶴年。鶴年亦不欲人知。寂然讀書。與古人為徒。予見而異之。噫。此之謂能自立其身與名者也。君既與予定交。乃傾篋出其詩。屬予相甲乙。三日卒其業。題五百字。還之。予蓋幸子載死後。又得一鶴年。張吾軍。君亦若唯予足。以知其詩者。凡予所交遊。能詩者。爭欲識君面。君亦欣然把臂。不復相拒。予覺鶴年向之冷峻者。而其和可飲焉。丙子。君舉于鄉。予亦假滿入京師。甫與饒霽南太史相見。拍予肩曰。吾邑同學一奇才。埋頭鄉山。二十年無一人知己。今年纔偕計車來。予訊為誰。對曰。何鶴年也。予啞然笑。之。告以故。噫。不汲汲求人知。而得一知己之予。不汲汲求世知。而未嘗不見知于主。亦能自立其身與名者。豈遂終窮也哉。丁丑。君下第。翩然去。庚辰。再下第。君貧不能去。詣予謀。予介天津二友曰。關君曰。王君。延之為子弟師。君怏怏去。歷數月。手書稱主人賢。再歷數月。稱樂而安焉。天津之詩已成帙。復寄予。甲乙予益歎君汲古之深。而聞道之早也。第憂生之嗟。嫉俗之感。隱然若不得已者。竊歎君方盛年。何鐵石心。

賜遽至於此耶。然而可以起衰式靡矣。既而聞君病市月。聞君死矣。主人具棺殮冠。服皆如禮備儀。從送君柩登舟。平安還里。予北望招魂。南瞻感涕。既痛君高才短折。復念君母年六十餘。繼妻五月而寡。無兄弟。無子。無田產。僅有先人老屋一椽。負城陰。嗚呼。逝者已矣。其生者若之何而可也。不亦痛哉。乙酉。予再假返里。登君堂。哭聲嗚嗚。滿帷中。君母不能成語。淚漉漉被面。予腸轉如車輪。嗚呼。若之何而可也。漉溪黃雨。椽進士與君友。篤侍君疾。扶君櫬。收君遺稿。梓君詩若干首。金谿何渭綸解元與君為宗兄弟。左右君母。具存問。代營殮葬。為君婦謀醫藥之資。且將重梓君全詩屬予序。嗟乎。如雨椽渭綸兩君。可為鶴年死友。而有古君子之風裁者矣。鶴年詩鞭辟刻削。不襲古人一字。凡世俗詩人肺腑中物。無錙銖犯其筆端。廉悍雋傑。生面獨開。雜之唐宋人集中。雖智者莫辨。非作者亦不知君詩之迥異乎時人所為也。西江詩廢墜日久。既生一楊子載。又生一何鶴年。而先後死亡。子載有三子。皆馴謹能讀書。鶴年竟無嗣。嗚呼。豈才之大者受罰益深。而容容者乃得久存于世。兼可邀人間祿與位。以誇耀鄉里市井乎。鶴年無所恃。其近者一渭綸。遠者一信宜。令恬溪而已。渭綸為宗人。且如此。若恬溪為君從兄弟。又豈能辭其獨任之責也耶。嗟乎。予倖竊一官。今且奉老母攜妻子。親泊天涯。并一椽而無之。所謂既痛逝者。行自傷也。鶴年

其有知乎無知乎讀君詩者亦可愴然而悲矣

劉氏重建五忠祠碑

劉忠顯公諱軫字仲偃崇安人元祐舉進士為北宋末名臣殉難金地宋史載忠義列傳中稽公平生禦災捍患法施于民以勞定國以死勤事祭法所垂百世不祧而知越州時惠政兵威尤著越民為公立生祠于圓通僧舍乾道丁丑史浩為州守徙公像于杏花寺左榜曰劉公祠逮元大德間公之十五世孫文質官山陰幕僚葺舊祠以忠簡公領忠定公子羽忠烈公純忠肅公珙配享稱五忠祠明天啟間公之二十五世孫左都御史宗周復為修治國朝乾隆元年六月初九日海風震盪垣宇摧塌自是春秋有司來祭惟就瓦礫荒基望空釋奠不亦衰乎閱庚寅公裔文壇廷棟等慨然曰祀典祠廟與城社並重官司絀于支銷歷久不治為後昆者烏能忍乃謀聯義會先集合族支長正誼等十房子孫益以文壇純淑等共十八人各出貲若干得三百六十金推文壇純淑董其事辛卯正月之望始建寢室享堂各三楹兩廡各三楹外門重門及繚垣告成在七月十有八日是役也溽暑風日中文壇督率力尤瘁計用錢四百六十九貫除收若干貫其闕者文壇補之而工以竣明日于姓具牲醴奉主于龕以肅始祀五忠之靈復有憑依於戲糴矣初越民歲輸鑑湖田租二

萬石積漸至十四萬石。擬隸中官充應奉之用。法嚴額重。通亡者輒勒鄰比償之。公到任首疏除其害。方臘反。陷杭睦二郡。越官吏咸過。公葺壘練軍。出奇兵擊賊。屍蔽路。萬戶以安。公功之在越者如此。餘載史傳不具論。嗟乎。古名宦豈不多乎。求如公之子孫。即遷居所治而大其族者罕矣。族大而簪纓甲第。至五百年。孝友弗衰。又能舉官司祠祀。廢壞者一新其制也。不更難哉。五忠拓其基。二孝闢其奧。總憲復以孤忠托其將傾之厦。而劉氏堂構門庭。遂堅固而不可拔。旁風上雨。但侵其有形之棟宇而已。夫何患焉。爰記其廢興于碑。而綴迎神送神之詞于左。

國有祀兮草離離。家有祠兮神依依。國廟毀兮子孫成之。五忠來兮閃靈旗。公納夏人兮西事平。公殺睦寇兮越人生。神軍潰兮郭虜歸。我佳兵諸馬兮公皆不可強弩射兮賊倒退。臣力竭矣乃去位。貫與攸兮豈知公。金人待用兮公曰不忠。酌卮酒兮解衣傍。千秋萬歲兮享漢毛。右迎神

公靈格兮祀事成。壽聖西岡兮公面如生。四忠列侍兮若家庭。式享式燕兮祀伊始。飲福受胙兮之孫子。官來釋奠兮靈賁止。越之父母兮劉之祖宗。國之一柱兮家之五忠。國廟再興兮五忠之宮。神其祐兮樂融融。右送神

贈兵部左侍郎墨潭周公傳

公諱儼字欽爵號又公別號墨澤姓周氏系出楚之營道縣為潯溪先生十四世孫其世次具載彝山公墓誌不復詳彝山先生公考也諱茹荼明湖南路正總兵妣吳夫人。生公及弟儒公早慧端厚年十三通經史十五能文章天啟間彝山公以智勇立功成名赫然遍天下國變後僭偽紛乘亂賊四起又數從王春石師相及忠國王公恢復數十郡縣既而觀時審變遂解印綬去官往侍二親于桐梓親歿返振彝涪州時康熙辛卯之歲也戊申公入庠甲寅滇逆偽帥遣聘使招致總戎公怒罵之儒恐激則致變請往謝至閩中為賊所留總戎公恚而疾公于是出奇計挈弟遁歸總戎公霍然起曰吾家清白不污矣吳逆設制科士被迫脅多往應公匿跡深隱乃奉父母避居黑塘山莊又徙白碇巖栖七載研究青烏珞球軒岐璞輅等書入理尤遠庚申九月譚宏亂賊眾百餘夜薄公室公挺戟刺其魁遽引去公與儒謀分負父母走力怯不任彝山公曰賊且復至兒等速遁勿同殉公抱翁哭曰今夕死耳不能以親委賊俄而賊果來儒奮身出敵賊砍之跳乃斬扉入攢刃刺公仆地而儒率鄰眾挾兵反攻賊為駭竄明日儒創裂將死公稍稍甦命昇榻就弟枕側與訣儒號而絕母夫人感慟成疾旋亦卒儒至乾隆間得旌其孝按史載孫恩之亂烏程潘綜扶父驪出避父老不能行令綜走不可賊來砍驪綜抱父腹下以頭面受四創死而復蘇

後有司奏改其村曰純孝里與此絕類第無兄弟同禍耳。儒歿後公撫恤孤寡備至。歷三十年如一日。且戒室人曰。必善視之。勿令嬌雛含痛。及姪頊漸長。乃分田及奴婢為立門戶。而翼之如初。于是再徙賢人鄉。建陸舫小孫。蒔花藥娛翁。使諸郎誦讀其內。庚午應鄉試得舉。名列第四。明年下第。同年生任典謨卒旅邸。公為具棺殮。護持還里。而彝山公病適劇。公禱天祈減己算以代。又嘗冀為默驗。翁病于是得遽痊。歷三年然後卒。公號慟七日。絕食。鬚髮盡白。形骸枯瘠。其至性純粹蓋如此。公仁惠重然諾。好施與。有貧者輒焚其券。或以妻子託。歷久無負。于友朋親喪。雖千里必往會葬。有東漢君子風義。又善方書。活人無算。甲申奉部檄謁選入京。八月病于舟次。惟一幼僕侍。乃檢行篋所著宗譜及詩文。俾遺諸子。遂歿。時康熙四十二年八月初五日也。距生順治六年十月十七日。歷年五十有六。附葬磨陀山莊。總戎公墓次。聞公讀書山中時。夜有奔公者。力拒之。且誓不言其姓氏。婦慚感去。鄉有虎患。公為文責神。謂奸凶橫行。神弗誅殛。乃縱虎為虐。有漸享祀越數日。虎盡噬里中大猾。而隱人咸異之。惟正乃格。不信然。公生四子五女。子珣珵珪珽登乙科。今天門多治行。孫十人。某某由科目出宰者四人。在庠序者五人。惟珽子燾由翰林起家。今官少司馬。曾孫若干。登賢書者興。沅興洛。惟興岱亦官翰林侍郎公子也。

太史氏曰語云孝而仁者可與言忠信而勇者可與守義公百行完美比德昔賢若全親于難則趙咨江革牛徽也脫弟于賊則趙孝倪萌淳于恭也滅算延魏縣厠嘗冀則王薦石建黔婁也髮白形毀則郭廷燁荀文師也至如豺狼遠徙猛獸避塗則又吳達司馬嵩也而暗室弗欺端潔自守于曹鼎陸公容有同軌焉嗟乎凡公所有者他人得一已傳于世而公兼備焉史稱濂溪先生清明誠一寡欲于無篤汎愛拯憂患護友喪守親墓泊然于世公恆肖焉嗚呼是乃濂溪之裔也歟

入祀昭忠祠鑑南吳公傳

吳璜字方向號鑑南浙江山陰人曾祖諱濬哲康熙壬子舉人官內閣中書佐大司馬留村公平廈門軍功加二級晉封賜一品廕祖諱振由歲貢生宰玉山安肅兩縣考諱煥文世稱樸庵先生國子監生有文不遇為時推重別有傳生二子公其長也母商氏為元江府知府諱盤之妹公生具宿慧能承家學乾隆己卯舉京兆鄉試庚辰成進士除戶部雲南司主事己丑出知湖南澧州至河南尉氏父卒于塗貧不能歸時知衛輝府朱政為公同榜進士延公掌書院服闋獨扶父柩歸里與母合窆于型塘先域癸巳再謁選益空乏三月棟發四川馳入衛輝仍寄孥于政去至西安黃斧竭中丞畢公沅贈金三十鎰乃得行四月十二日抵成都金又竭拮据得十鎰買

鞍馬五月十七日詣登春軍營山水惡劣積雪不融盛夏扶輿猶有寒色大將軍某素失將士心六月二日賊圍登春急初十之夕木果木一軍潰大將軍死明日總督冲圍得出登春一軍亦瓦解公偕妻叔周輔鈞馳至崇德山梁賊鎗中輔鈞騎突逸不能止返顧公為礮石飛擊人馬墜溪河中同墜者四千餘人時年四十七事聞得贈加道銜入祀昭忠祠子安祖方十齡得廢如公族同時死兵禍為予友者則有南昌彭同知元璋大興孫知縣維龍湯湖王主事日杏松江趙主事文詰維龍先一日死日杏後一日憩山塢中賊飛石死文詰被賊斷臂死元璋挾三奴徒行賊且大至奮身躍江中時年六十有一公性嗜學重友義為舅氏商公愛重能苦吟篇成數改竄求必傳一字不安至廢寢食飲酒談文終夕不倦奴子苦饑怨聲嗚嗚如弗聞者然議論馳騁輒以人倫網紀為任都下端人名士咸器之所著有蘇門紀遊及黃琢山房詩六卷惟入蜀所作棄亂軍中可惜也

論曰予聞周生云登春突圍時鉅南荀疾馳尚得脫顧攬轡夷猶謂周生曰偷生無補于事死吾職妻子君之責也語未絕遂墜澤中嗚呼予在越州與公交遊且一載或目為詩人至此而公之論定矣予蓋聞公平日所志者大也然而報國僅止于此乎予又怒焉垂涕已

杭州府餘杭縣知縣蘇公傳

秦中蘇氏以功業文章氣節顯于西漢唐宋載諸青史者不可指數其逮於府谷之祖則自元末廷美公始數傳而後其以縣令長史儒官著聲者代相繼然俱不顯赫又世際太平故以義烈見稱者絕少其服一命之官已去厥位無守土之職必死之責而能臨禍難蹈白刃甘之如飴大節炳于天下後世者則餘杭公之義烈為最公諱萬元字澤我由萬厯年明經考授杭州府經歷以在官廉能權知餘杭縣事懷宗朝予告在籍道士賊高有才據邑城賊徒郝某率眾劫公使從公大罵之賊知公不可屈乃繫以索繫公笑曰吾廉吏耳未嘗作賊殃民安得此即有亦安能媚賊耶賊怒大索堂室間掘地至三尺許無所獲乃交刺公仆于地瞠目曰賊技止此耳言畢氣絕域中方勗公子呈書年未冠經營數晝夜具柳棺為殮視公目不少瞬顏色凜凜然若將起立者遂葬于家門北國朝順治六年改葬縣西荷花塢北山之陽制撫提學皆奉綽楔旌其門事載省志公元孫遇龍壬申成進士既而得浙之龍泉令瀕行具公靖節狀乞為傳乃據實以書

論曰明末流賊縱橫秦蜀間食祿守土之臣棄城逃竄反面事賊充然無復廉恥之色者紛紜矣或謂公一家居縣令耳賊至可去不及去或可不死死或可不必熱鳴

呼。勇矣哉。士君子不幸生亂世。無尺寸之柄。以禦賊。至攘奪我先。嗟。塗毒我桑梓。義憤所激。有不與賊俱生耳。何避為。故當賊至。不去時。度公舍生取義之心。若不死不安者。故罵賊烈而受禍甘。使公當時有封疆之任。捍禦之權。必能奮身殺賊。即不幸城破國危。而致命遂志。又何多讓于平原常山。睢陽數公也哉。然其心則一也。於戲。

明湖南總兵彝山周公墓誌銘

明總戎彝山周公歿七十有九年。公曾孫少司馬海山公。視浙學已三載。捧家傳。屬門下士蔣士銓撰公墓誌。再拜而謹觀之。不敢辭。按狀公諱如茶。字自飴。號彝山。別號丹井。先世居楚之營道縣。仕元爵萬戶。公之祖隱姓名。稱伏三郎者。為潯溪先生。八世孫明初徙居蜀之涪州相公堡。生允升公。以孝得旌。官銅陵令。生顯風公。由孝廉同守開封。生梓溪公。官武昌郡丞。有治行。王陽明撫贛。平宸濠。公轉運有功。鑄鐵像于彭家澤。萬厯中。追封虬侯。生誠所公。以父勲錄用。官神樞四營副將。娶豐城聶氏。封一品太夫人。即總戎公考妣生子三。總戎公其季也。公五齡而孤。既長。淹貫經史。習韜鈴。具文武才畧。後以功臣子。奉命帥師討賊。終天啟之代。數立戰功。明末甲申。北京陷。蜀有姚黃之寇。張獻忠復入川。三路犯涪。里兒羣噪。夜半撼公扉。欲推戴弄兵。公叱去之。師相王春石公鄉人也。故重公。適以聘公入幕府。因仗劍往從。至

纂江奉檄佐鎮將賈聯登恢復各路明年渡江津永榮銅壁等十餘縣尋復捷屢上為忌者中沮乃駐師時誠所公以家避亂桐梓公詣軍門請以兵馬屬營升楊果自往省親旋以病不能返部卒乃殺楊而散公方欲收合餘衆會重慶陷遂走江津謁忠國王公因入幕時糧饋久絕人心洶洶公勸移師鎮安就食徐規進取忠國善其議公于是率兵前驅所遇無犯有弁犯法當斬公為諫止忠國怒曰汝替若死耶公屬聲曰某死則無敢言之人若死則無敢戰之將遂得釋軍中厲禁兵弁藏煙草者主帥坐駢戮有販客匿煙貨擔中公偵知急遣僕夜往屏除且鞠之無實盡釋去既而遵義重慶成都等處以次收復皆公功朝命于是拜公湖南正總兵未幾忠國死偽秦王某將叛欲羅致公公逆窺其隱力拒之乃以終養解官去辛卯壬辰父母相繼卒康熙初挈家返涪乙巳迎柩于桐梓歸葬而功名之念淡矣甲寅滇逆偽帥慕公名遣幣聘公擲書罵曰庸奴我豈從賊者次子儒進曰激則致禍兒試往謝之至閬中被留為篋公憤恨成疾誓不服藥長子儼出奇計往來漢沔間竟挈弟返公大喜病為少間庚申九月公復臥病值譚宏勳賊夜半薄公室二子倉卒救禦儼被重傷儒乃殉夫人旋以慟儒卒明年都統李某既擒宏欲盡殲餘黨為公雪仇公亟使尼曰實寔逼摧殺戮相報甯受始殃勿延終禍李聞而歎曰長者也乃止公撰著最

富晚年盡焚之。其教子則曰。望汝為一品人。不望汝為一品官。作訓辭及葬山迂言。以為戒。疾既革。仰天太息曰。始吾疑伏波裏尸語。以為矯。今而後乃知許國者。固自有志也。泣然而卒。於戲。公生勝國末季。投筆從戎。歷戰陣十餘載。未嘗殺一不辜。而全活無算。古名將陰功。何愧焉。洎天下初定。公于傾側擾攘間。用兵如神。恢復邊城。掃除凶鋌。有席捲風馳之勢。勲名烈矣。顧觀時知止。解甲歸田。賊餌爭投。屹然不動。乃至室毀雛傷。老死邱園。困窮不悔。非道力堅凝能若是乎。涪之人曰。公少時遇道士召使學仙。公不可。乃陰語人曰。功名士也。廿九年後當來導。然勿嗜殺人。厥後昌矣。乙巳冬。復有道士途招之。公請葬親。訖從之遊。後雖弗果去。而屬續歷二日。體尚柔。和可舉。或疑為羽化。蟬蛻之異。史載李泌不報人仇。張詠前知來去。各有神仙姿表。公其侶歟。惟限于運會。遂令忠義莫伸。槁形牖下。亦可悲已。亦可悲已。公生于萬曆四十五年八月廿九日。以康熙三十二年二月二十四日卒。歷年七十有七。配吳封夫人。子二。儼。康熙庚午舉人。儒銅梁庠生。乾隆七年。旌表孝子。孫六人。某某。曾孫十人。某某。元孫若干人。某某。葬涪州長里磨陀山莊。子儼。附之。銘曰。

崇文定蜀。閭井不驚。曹彬帥師。善良弗刑。公兼有之。完節與名。桓桓將帥。久來富貴。功名不終。禍積為崇。公殷鑒之。角巾而退。不嗜殺人。其後則昌。忠孝之門。節義文章。

振振繩繩。偉哉侍郎。塚象祁連。巴山並峙。公偕赤松。時一泣止。七十九年。泐銘為史。

廣州府同知屏文魏公墓誌銘

公諱綰。字帝臣。號屏文。姓魏氏。先世由陝西榆林衛皇甫川遷正定。始祖從信。明季甲戌武進士。官車鎮總兵。殉難。祀名宦。廕一子用權。用權生成。由武科官貴州平越守備。擢遊擊。致仕。遂家于平越。生子四人。次景舒。國學生。配劉氏。即公父也。公生七歲。喪母。十三歲。喪父。父病刲臂肉以進。居父母喪。皆能盡哀禮。如成人。以孝聞于鄉。公讀書持躬。以明道立德為學。嘗積石牀褥下。籍警酣臥。苦志如此。為文無詭氣。有法度。見賞于其鄉先生王公士俊。旋補博士弟子員。即登賢書。時康熙庚子歲也。一應禮部試。不第。遂講學平遠。求濂洛關閩之旨。後學習兵部。至雍正十年。試用廣東知縣。令增城者三載。令南海者八載。既而署肇慶通判。調石城令。再調新甯令。一署嘉應州牧。再署南海令。乃擢廣州府澳門同知。越五載。乾隆丁丑十二月十二日卒于官。公歷任二十有六年。所至皆有聲。為其民者。皆能尸祝之。公之政不能備書。其在增城也。曾放囚歸視其母。三日如約至。其在南海也。修建學校。教育士子。文風駸駸然。又嘗治某童被殺。獄求殺人者不可得。夢一人以兩手向公作離合狀。乃偵得改革之工。鞠抵之人。以為神。石城有虎食孀婦子。公為文告城隍之神。得虎磔于市。

而奸民廖氏以五虎稱者前官莫能制公盡誅之新甯嘉應澳門之政各能因地利民開釋冤獄故新甯人嘗于元夕結鎗為字以頌娛其官公之德教感人何如也嗚呼幼以孝事其親長以道德教其鄉人及其仕也誠信神明加之以敏至則愛之如不能盡去則挽之如不可及立身有本未居官有體用如公者豈非賢大夫也哉吾又聞公性豪宕以俸錢仁九族不少吝客死者皆力返其喪故其歿也無親疏皆哭之慟夫位不稱德者有後以是知公祚之興正未有艾也公子九人孫九人配熊氏封宜人公生于康熙三十九年二月十六日行年五十有八卒大文乾隆丁丑進士官翰林公仲子也葬公于黔銘曰

孝能事親學足善人而其政復宜于民公苟不信囚胡以歸公苟不誠虎胡以累才足大用于世而官止於斯海南之人恨不得而葬之平越之山何屢屢還神于天藏骨于土隆然覆夏屋者是為東粵循吏魏大夫之墓

贈文林郎孝子吟臺蕭公墓誌銘

公諱御龍字乘六號吟臺姓蕭氏浙江構李人曾祖侍峯公遷錢塘卜宅西湖遇者指為高士之廬子會嘉公有智畧務施與惠周鄉邑孫二長某字潛起次即公也公天性孝友稟奇慧凡觀書不再讀淹博能文潛起公不善治生家日落食指數十人

公毅然請廢書任家督。乃負米幣絲。探奇贏走各郡。數年復其產。會嘉公故豪俠。遺約二十人。醵錢為會。凡濟喪葬者。額四十千。嫁者減十千。娶者減其半。慶祝者再減其半。清波門外。周四十里。恃以緩急。舉火者數百戶。行之若干年。天竺靈隱集慶三寺。比邱六十餘房。屢為豪猾侵侮。會嘉公出強力捍禦。淨土得安。市井頑梗。薰公之德。至今以訟為戒。歿時哭而送葬者數千人。偕配周金田三氏合窆于龍門山。公考卒年五十有九。當疾亟。曰。公廢食寢不離側。每晨犯曉入城。購人後。閱五旬以為常。然不可救。乃豫絡左臂作痛楚狀。或問之。以創發對。夜分跪禱祖宗前。剖臂肉。刃銳斷三筋。昏絕于地。頃蘇。糝土傳之。晨雜復藥以進。考歛之曰。大佳。吾疾當有間。時九月之望也。翼日事稍洩。考病復劇。閱四日呼弟用嘉公屬曰。吾屢以厚貲營穴。輒不佳。父棺未葬。吾豈瞑爾亦子也。當力營之。孫或未可恃耳。言訖而逝。公號慟數絕臂。創崩裂。糜爛百日。竟無恙。已而哭曰。孫何異于子。遂不能葬祖耶。矢志任之。舅氏周篁坡精青烏術。公時聞雲林暮鐘。戴星疾馳過桃源嶺。甫夜及半。猝遇虎。公伏山亭梁上。虎仰視而去。比至周家。遂偕歷崎嶇。且半載。得龍門吉穴。購以數百金。于是先世七棺俱就窆。窆云。越歲己酉。遷京江杜叟形家也。偕登楊梅塢。叟指北高峰之西。必有穴。尋往覓得之。即公祖順治初年所購之山。乃以原配俞氏瘞之初公事兄如

父撫兄子二人。教養婚娶竭其力。公年四十餘始生子五人。然衣食恆啻于兩兄。公荷家計三十年。兄卒後兩兄子謀析產。且盡據其豐美者。公謂長子立選兒意云何。對曰。父讓之以成友愛。兒輩敢競乎。公大悅。乃取荒山數嶂。旁舍數楹。至是全家啜粥矣。公瀟灑冲淡。學有本源。以內重外輕。勿求利達為庭訓。平居以善惡報應警惕諸子。歿之日。端坐而瞑。時乾隆癸亥二月初十日。距生於康熙癸丑十二月十五日。春秋七十又一。戊辰八月。偕繼室鄭氏合葬于原配之墓。杭人呼公為蕭孝子。以公遺命未許請旌。公子立選元選宸選青選萬選立選學有根本工纂著兼精名法家言。乾隆庚辰恩科舉人。壬辰試用江西知縣。歷宰劇邑。聽訟詢然。問會如家人。不稍涉矜躁。得情後雖受撻者。咸叩頭感服去。蓋克承公正學而為循吏者歟。銘曰。中興而家復兮。學成可棄也。斷筋而刲肉兮。臂糜弗廢也。戴星而納麓兮。虎耽則避也。讓產而受福兮。同穴斯瘞也。牛眠而龍伏兮。厥後有熾也。惟孝而大其族兮。茲阡當永峙也。

王猛論

張洲

賢智之在人國。君用其言則有功。不用其言則無功。且至滅亡。何者。其成敗得失之數。惟賢者知之。而君心時或昏明之異。則多欲蔽之也。語云。旁觀者智。當局者迷。又曰。利令智昏。蓋可見焉。符堅之於王猛。求之切。任之重。禮遇之隆。信用之專。論者比之昭烈孔明。故能所至有功。削平諸國。吞併中原。已有天下過半。至猛臨終。遺言謂江南正朔相承。勿以為圖。堅違其言。遂有淝水之敗。而國隨以亡。觀悲猛之語。其曰天不欲吾平一六合。何奪景略之速。夫猛勸堅不可圖晉。而欲平一六合。非圖晉而何。則其不用猛言。幾已見於此時。甚矣賢智之言。有關國家興亡。非可忽也。抑予更有感者。石勒之有張賓。同堅之有猛。賓之才可方子房。其賢智同猛。勒呼右侯。不名。言聽計從。志意投合。其禮遇信用。同猛。顧猛之仕秦。人人知之。而賓之仕趙。雖在學士大夫。或且不能舉其姓字。則又何也。夫以賓猛之才。得遇漢高光武。其所表見樹立。當不止此。不幸同事僭偽之主。然猶有顧晦之殊悲夫。靡為有夏再造第一功臣。乃尚書太史公本紀俱所不載。僅得左氏傳。魏絳旁及之一言。然則古今之士之才。而不過遇而不能有為。有為而事蹟若存若亡。不得昭著人耳目間者。可勝道哉。可勝道哉。

王朴論

天下未嘗無才而論治者動曰世無賢才者誣也。即當衰亂之世居分裂之國值傾危之朝為之上者苟知殫精圖治總攬英雄求賢用才惟恐不及自必將有奇傑偉之士仗策而來應時而進以相與贊助謀猷經畫政事其或虛如無人之國則其君之未嘗知所求知所用而固非其時其地無賢者無才者也。特其賢者才者伏處而不出耳。譬如漁者不施網罟而諉咎於江河之無魚樵者不施斤斧而歎置下之無新孰謂可哉。觀周世宗之用王朴可知已。世宗當五季干戈紛紜之際慨然求得一王朴而用之朴為人明敏多智有謀能斷迄今讀平遠策其論天下大勢決得失成敗之數判攻取難易先後之機瞭若指掌明若觀火雖鄴侯漢中之語高密河北之言武鄉隆中之對何以加於此者。惜其君臣早逝未克竟其設施然其效已略可睹焉。蓋駸駸乎有削平諸國統壹海宇之漸。儻天假之年周其可量乎。則知天下未嘗無才而論治者動曰世無賢才者誣也。且以石勒為趙而有張賓以苻堅為秦而有王猛以姚萇為後秦而有尹緯以石敬瑭為晉而有桑維翰或僻處一隅如張重華之在西涼而有謝弼更微末如高季興在荊南亦有梁震而極盛之世治平之國登明選公之朝又不待言。昔漢文帝博辭而思頗牧馮唐所以知其不能用也。夫天

下豈有借材異代者乎。明莊烈帝讓羣臣曰。朕非亡國之君。卿皆亡國之臣。嗚呼。用亡國之臣者。誰與。莊烈謹身節用。勤求治理。卒以身殉社稷。為漢唐宋亡國所未有。獨其用人。未能辨別賢奸。於其任。為程武陵宜興。可見也。何不觀周世宗之用王朴乎。吾故曰。天下未嘗無才。而論治者。動曰。世無賢才者。誣也。

屈蠆軒記

物之屈者不自屈。有屈之者。然有屈之者。而其屈也。惜矣。草木之枝。或挫抑以屈。水流屈曲。從崖岸之地勢迴旋。古今人屈者多類此。馮唐屈於白首。李廣屈於數奇。屈於命者也。賈誼之屈也。以銳進。劉蕡之屈也。以忤時。屈於人者也。此皆有屈之者。乃卒未由得信。陶潛林逋之徒。備然物外。則自以屈而不求信者也。袁邵公之在洛陽。謝安石之居東山。則又以自屈而自信者也。顧其所以屈者。本無與於精義入神之微。故其所為信者。弗能彌綸天地之大。彰致用之妙。善自屈者。蝸角之居。十笏之室。可以藏萬變而裕古今。其屈也。非徒屈其信也。有獨信。斯不已。卓然有得者哉。南徐劉子漢翔。以奇才博學。丞扶風屈矣。自扁署東偏小軒曰屈蠆。蓋取易大傳之文。以寓其意。因集圖書左右。暇日吟咏其中。若是者數年。弗輟。庶知所以自屈者焉。夫其所以屈者。莫可得窺也。吾將觀其所為信者耳矣。

江舟出峽記

蜀萬山區長江行乎其間率不數里數十里即灘無灘不危惟峽灘為著自平羌峽來入巴峽至夔門所在峽多有惟夔巫諸峽特險且長為蜀路要害云臘月乙未抵夔舟泊觀魚復浦積八陣圖聚石為橋水漲即沒水落行列如畫不可亂亦一奇也迤東至少陵祠憑弔久之登白帝城謁昭烈廟城踞白帝山東連赤岬北近麝香南臨瞿唐對岸白鹽夾江並峙灘瀕堆在其間巨石孤立江心形如獅蹲昂首南向冬時出水餘三百尺聞夏秋盛漲至且滅頂或高出數十丈可畏哉灘谿經赤岬白帝間與草堂谿合紆回入江山谿之流土人皆曰灤其間即東屯也前為峽門有鐵柱二巴蜀衆水匯流於此杜詩所謂水合數百源者是也丙申午發經龍脊灘灘瀕石入瞿唐峽口峭壁刺天中通一綫壁間鱗鱗然斧鑿痕宛在丹崖翠嶂林巒秀出舟急路轉目難徧給過黑石峽峭窄甚為容舟行則又峽中峽也誘曰灘瀕冒頂黑石下井信乎危哉至門扇峽即瞿唐東口前有虎鬚灘皆瞿唐險處值風雨晚泊放翁云瞿唐峽中聖姥泉石上一罅人呼於旁則泉出屢呼則屢出可怪也惜順流迅疾未及一試丁酉晚發過大溪口經泗瀼泗瀼者淵水橫來兩山對立一名錯開峽抵巫山縣隔昌江東南即巫山山形正如巫字昔人謂巫山象形今乃見之良有然矣

篳山琵琶峰相距不遠皆以形象得名琵琶峰隔大江南五里其鄉婦女曉音律有女子出嫁前夕鄰里合樂送之蓋土俗云爾入巫山峽十二峰皆在北岸幽奇絕倫而神女峰特為娟好晴雲輕霧即離映帶即朝雲峰也山前馴鴉送客回翔孤蓮之上色如常鳥形僅比鴝鵒小者入蜀紀云八月十五夜月明時有絲竹之音往來峰頂猿狖齊鳴達旦漸止異已神女之事宋玉特以託諷本屬子虛吳船錄辨之誠是乃謂廟中石刻引壩城記稱瑤姬西王母之女雲華夫人助禹驅神鬼斬橫石疏波有功封妙用真人則益誕妄不經而石湖信之何耶過三分泉泊萬流驛有萬流溪發源施州至北入江驛因名為巴楚分界處戊戌發萬流至巴東楚塞邑也江岸秋風亭為寇萊公遺蹟經石門關巖崖間有石門僅通一人行過葉灘峽中名灘與新灘並稱者有葉牀葉枕夏時水覆牀枕舟行甚難今石皆可見故無恙然湍悍猶令人悸一曰狼尾灘東天慶觀觀前即叱灘抵歸州城中城外礧石牽出無片土寸壤門臨人鮮甕巨石鐵黑色槎枿猙獰縱橫波中山谷詩云命輕人鮮甕頭船日瘞鬼門關外天可怖也香溪口小泊尋玉虛洞溪以昭君得名登舟過石門灘白狗灘入白狗峽一名兵書峽絕壁小洞露出數片石如書帙狀東即新灘俗謂青灘者三峽首險也舟人不敢遽過因泊己亥盡出舟中所載人貨登岸陸行空舟而下乃施柱

為巨浪所摧。泊空舸峽口。明日易純柱。迄未乃發。空舸一名馬肝峽。崖有懸石如馬肝。獅子巖。孤舟峰。纖秀妙麗。殊可觀。峽口東湍灘。湍渦洄洑。交錯其間。操舟避就。稍疏。即不可知。與忠州之折魚相似。過灘夕泊。辛丑早發。過連洞灘。惡灘也。乃灘際多巧石。取供盆盎。離奇可愛。前望即黃牛峽。過使君虎頭鹿角諸灘。至黃陵廟。傳云神佐禹治水有功。山半有迹。如一人著帽牽牛者。云是其神。廟前無義灘。亂石礫硤。如劍戟。齒齒險絕。不可嚮過。又有渣波灘。五峯石。長林磯。輪頭石。紅石子。險與無義等。蓋黃陵廟上下十餘灘。總名竹節灘。俗謂駭站河。入西陵峽。觀蝦蟆碚。水品所謂第四泉者。過扇子峽。即明月峽。泊平善壩。言灘險已盡。其地平善也。壬寅舟發。抵下牢溪口。捨舟涉峻阪。探三游洞。沿溪登舟。泊至喜亭。是日歲除。三峽之名。說者不一。惟以瞿唐巫山歸鄉為三峽者。是。蓋自灘瀕堆至虎須口。總名瞿唐峽。即夔州峽。自巫山抵巴東。沿江一百六十里。總名巫峽。所謂巴東三峽。巫峽長也。兵書峽。空舸峽。總名歸州峽。即歸鄉峽。而黃牛西陵明月諸峽。則又歸鄉之餘尾也。明日癸卯。為辛卯歲。元日。舟停不行。舟子俱宜昌人。數日乃發。過荊門十二碕。虎牙灘。四望平蕪。煙波浩渺。回首五龍雞籠等山。比峽中高峰。茲培樓。耳正月甲寅。記於荊州之沙市逆旅。

探靈巖記

略陽值亂山中層巒觸目顧幽邃奇秀供游覽者厥惟靈巖予以易舟泊其邑明日
夙興朝食涉八渡水循嘉陵江並崖南行攀藤歷磴而上巖洞廣敞可數百坐枿櫨
三株覆崖下不蒙雨露高尋丈異哉前軒三楹俯瞰滄波潭者渟渟灘者湍湍匪一
致也對岸諸峯嶙峋蔽日右有泉出石罅僅豆許遠松栢間曰藥水泉謂飲可已疾
巖半刻郝閭銘碑郝閭在縣之白巖漢李翕建勒銘鑿懸崖濟行人者銘隸書相傳
蔡中郎作未有以知其必然也後閭廢路移碑存至剝蝕不可讀宋李虞卿權興州
懼久而泯滅刻石靈巖用永厥傳泉東南小洞深不可知洞口石柱天然撐拄二洞
隔不數武而絕壁峭削不可達也懸棧以度闊尺臨巨壑行者怖慄西北隅肖髯令
像髯令永年李氏名德性明萬歷舉人有惠政縣人不忍忘祀之勒所自為贊辭於
碣意若自託於桐鄉可以知其心存不朽者已頃日落山幽暮色蒼然乃還出山日
尚晴也依來徑仍涉八渡歸八渡者一百八渡河也經者必一百八渡乃已故名農
人語急以簡第曰八渡八渡云庚寅三月二日

石砭城南石砭記

萬安山東南可三里一峰特起高視萬安倍且五之為石砭山山下有溪源遠而波
細流經其北趾抵萬安山麓合南濱曰東匯溪循溪口而東可上盤旋數折上有池

深五六尺。澄澈見底。游魚上下。厯厯可睹。池旁埤垸之迹。廢然蒼莽。間頽圯僅有存者。巖畔鑿孔。巨石為豎旗磯。即石砦故址。顛頂地席井。三面臨絕壁。俯視千仞。北有徑可登。望之數百里之山。攢積重疊。出沒隱顯。皆可指數。蓋石砦近城諸山。高且險。無逾此者。傳為女士司秦良玉屯兵防寇處。故土人曰石砦。云明崇禎庚辰。流賊犯蜀。獨綴甚。良玉單騎見撫臣。議欲以箸帚盡發溪峒。白桿兵土司調兵急。則以箸能食者畢至也。更急則以帚掃出境也。撫臣以無餉謝。良玉泣而出。後復請益守十三隘。當事不許。而全蜀以陷。乃據險守固。戒所部毋得從賊犯者。族無赦。賊徧招諸土司。而莫有敢入石砦境者。鄧都忠萬人多依之。卒賴保全。使其計行。賊必不得入蜀。即使入蜀。可戰而卻。蜀必不陷。沒何至寇氛彌熾。荼毒生民。使成梓果。閩諸郡。汔無噍類哉。經其地。輒行遺墨。猶可慨然想見其忠勇。而歎奇謀之不果用也。乾隆癸巳十月二十五日。同遊者二客。皆造極而止。

烈婦鄭氏傳

吳紹曾

烈婦鄭氏世居嘉興郡治南之雙節巷年三十歸平湖貢生胡世崇怡亭為繼室怡亭本世族其居家有禮節烈婦初入門即能體怡亭意事姑得其歡心怡亭故有妾烈婦遇之甚善踰三年姑歿未終喪怡亭卒無子其明日烈婦自縊以殉時乾隆甲申五月十六日年三十有三方怡亭之歿也烈婦已號慟昏仆者再猶強起憑族衆立怡亭兄子某為嗣又經紀含斂具甚詳悉死之晨飭敦匠事猶井井也日將午語家人暫登樓少憩會嗣子以需某物請叩門久之方聞聲效聲已而門闢烈婦旋下樓哭泣如常及復登樓已日晡矣抵暮家人請燭於烈婦叩久不應扶門以進見烈婦服縗經自懸於臥榻前急趨救氣已絕及檢榻間有嫁時衣一襲其領緣及前襟多流涎血沫歷歷可驗家人終莫解其故余執友張君子遜為余述烈婦事且曰殆烈婦初縊時御此服蓋舉居恆所宜殮者服之也既又念姑服未除夫方小殮復下而易衰經以就死焉誠哉子遜之言也夫婦人以身殉夫者往往悲楚激烈卒就死所已足為生人至難之行而乃縊而復下下而復縊倉猝間斷然不苟有如此要非察理至精而行之甚安者必不能也然則烈婦之所以自處於平時蓋可知矣怡亭之所以式教於家更可知矣

吳紹曾曰。夫子之傳易也。一則曰。妻道。再則曰。臣道。致身之義均焉矣。前明流寇之難。檢討汪偉妻耿氏。與偉同縊。偉就右。耿氏就左。既投縊。耿氏復擇止之曰。雖在顛沛。夫婦之序不可失也。正位而死。其從容就義有如此者。若烈婦之易服。再縊。殆庶幾焉。宜乎殉之。且卒未嘗或介。幾微於辭色間也。乃直書所聞。以質子遜。所以據吾黨欽仰之意於烈婦。又何加焉。

袁貞女傳

貞女秀水人。姓袁氏。康熙庚戌進士吏部文選郎中諱定遠之曾孫女也。父某早喪。偶納某氏女為妾。生二女一子。貞女居仲。乳名金姐。許字同里萬氏子。某萬世族有寡母者。育孤而長。聘貞女三年矣。年十九病瘵。貞女聞。即以死誓。且語其姊曰。吾必為萬氏鬼。及萬氏子卒。貞女號泣欲往視含。飲父母不可。貞女一晝夜哭不絕聲。勺水不入口。將投繯死之。父母不得已。命姑詣萬氏。萬氏母堅謝曰。貧不能自存。又奚以字婦。父母又以語告。貞女哭對。兒故知其家貧。第往即餓死。兒亦甘心也。遂適萬氏。其所服衣履。出之篋中。蓋貞女知萬氏子病不能起。已預為之辦者。至則憑尸哭踊如禮。朝夕居喪。次不遑。父母憂貞女。即就死。假鄰家一女奴守之。貞女謂女奴曰。我胡然。我姑老。又無以為活。我將執女紅以終事我姑。每見姑哭。子過哀。必多方慰。

之踰年貞女忽病歿。是為乾隆九年某月日。年僅二十。嗚呼。自古在室之女。壻死。不嫁。且而以身殉之。知禮者往往引經為斷。謂是賢智者之過。而卒獎其扶植人倫。為士君子所樂道。若予觀貞女所處。為尤難也。夫一時義勇所激。毅然從死而不悔。所難者從容之死。靡他耳。乃或者依託有人。以終未亡。抑得嗣子。以安同穴。又或幼讀書。識大義。有然而貞女不爾也。其所出也微。既乏母氏之教。父亦庸謹無能。未聞奉先世遺澤。以誠貞女。家故赤貧。以緣履餬口。為萬氏者。又絕少強宗。足以庇寡立後。而貞女獨不為一往激烈之舉。直欲仗女紅以終事其姑。所處非尤難者耶。嗚呼。其性使然。其不幸踰年以死。而未竟其志也。吏部為予曾王父給諫公僚友。而貞女之從祖母。又予婦諸姑也。其得之也詳。故當貞女之死。心許立傳。今忽忽十年矣。昨聞其母弟死無後。因傷吏部之裔不絕。如綫。為訪萬氏母。已貧老垂死。懼貞女之遂即湮沒也。書此以備載筆者採擇焉。

宋太祖論

程大中

言有甚美而不適於治。踵而效焉。而害滋甚者。不可不察也。宋太祖幸洛。張齊賢布衣獻策。頗稱旨。既而怒其堅執。斥去。歸語太宗曰。我幸西都。惟得一張齊賢。吾不欲官之。他日可使輔汝為相。嗚呼。此言之甚美。而不適於治者也。天之生賢才也。如衡量然。小治亂必有人在。其下應之。不相借賜。而人主用之也。若病者之於醫。饑渴之於飲食。少緩焉而不得。太祖規模初立。其於治。豈不汲汲哉。方病而遣人醫。方饑而餽人食。雖愚者知其必不可也。宋史曰。太祖之心。公天下之心也。或以謂不然。特忿其堅執云爾。夫太祖願治之君。有從諫弗拂之美。以小怒棄大賢。或不至是。就使真為公天下於太宗之心。其於用人致治之道。則悖甚矣。齊賢不足用。與棄去不顧可也。若以為足用。即自用之。以次相及。他日非太宗之齊賢乎。如曰。故抑之以老其才。則齊賢之策。既已稱旨矣。仲華之於漢。景畧之於秦。類以年少立談。贊成大業。用人而必於龍鍾衰老不堪事之後。吾不信也。齊賢亦幸而用耳。萬一不幸。沈淪湮鬱。早死牖下。或放言自廢。絕意不肯復出。又不幸使小人聞其說中傷之。終身阻絕。公天下之心安在也。故曰。太祖之言甚美。而不適於治者也。傳曰。見賢不能舉。舉而不能先。慢也。使夫人之於賢。不舉不先。安然而有所藉口。太祖之言為之也。嗚呼。其害

可勝道哉

洞庭濯足圖說

吳子鳳浦圖其小照曰洞庭濯足或疑其所用者小而所取者大為虛擬而失實予
以謂此拘於方者不足以知鳳浦也今夫物之相為用也必其力足以相勝鵬之用
風必於扶搖鯢之用水必於運海蓋非得夫寬然有餘者以游其生則鯢與鵬甯終
身不徙而其力之大苟不足以勝夫風與水之寬然者亦不能用其餘也其在於人
周身之用而百族備焉耳目之所留連性情之所寄託皆不能不寓於物物之待用
也或在千里而遙或在咫尺之際一皆渾然並列以俟夫人之取給而有餘不足之
故不能不視其人器量之大小而聽命焉大者之不復取小亦猶小者之不能用大
也是故風之扶搖也凡為鳥者不能至也而鵬用之以為苟可以飛而已海之運凡
為魚者不能從也而鯢用之以為苟可以徙而已洞庭之大衆人之所駭視而却步
也而鳳浦用之以為苟可以濯吾足而已此所謂湖海之士也其胸中之奇吞吐出
沒於瀟湘雲夢之間者無所往而不寓故隨所寓而適足以用其餘彼亦惡知夫洞
庭之為大而濯足之為小哉即又惡知夫洞庭之大之不適為濯足用者而拘於方
者甯足以知之與或曰洞庭始波木葉微脫悲秋者以之或謂鳳浦潔清之士惡夫

涉濁流者之行吾足也。故於洞庭有取焉。吾觀鳳浦為人和平樂易。於秋宜無庸悲。如其託乎清流。則絕潢斷港。何不可以濯吾足者。而必洞庭之為哉。吾惜夫拘於方者。知其一二而不足以喻乎大也。故為之說以解之。

藥村詩鈔序

李子藥村。屬予序其近詩。越三年矣。予久負諾責。而藥村之詩。亦復私之篋行。若與予言相待者。蓋其自視所為。與視予之言。皆不苟如此。方藥村總角時。與予為文酒之社。登山臨水。刻燭引杯。藥村未嘗不在。興會所到。隨物賦形。愈捷愈工。一時能言之士。少復過之者。及予北走燕趙。西適鄆郢。負米薪黃間。罷詩不諱者殆十年。而藥村方屏跡漢江。輟落人事。日與鶴閑。念堂諸君。講明切究。其詩乃益以進於古人。予既歎予之廢棄。於是為可惜。而又幸藥村之久於其中。不少易者。為卒有以至於成也。嗟夫。自古文章之變。不壞於老成。而壞於年少。負意氣務為可喜者。蓋入之也。未久。其所得已不潔。而復以意氣持之。則學問之途。不能以博其趣。而性情之感。無由以得其平。於是謫異於篇章。摺摭於字句。要妙於聲音節奏之間。以求可喜。而其蔽乃有不可勝窮者。紹述之於文。長吉之於詩。昌黎雖亟稱之。而卒不能不詭於正。咸於年少故也。向使由是而之焉。淵然充以學問。更幅然理於性情。其所得豈直如彼。

而已哉。藥材惟入於其中者久。故能用古人之長而去其蔽。而所得者深。故愈久而愈若不足。而不苟於求一時之知。今所抄古今體詩十二卷。皆從漢上得之。年少可喜之作。亦已不存。而予與藥材各有四方之志。回想平生尊酒過從。其樂蓋不可復得。而予又安能已於言耶。

陸筱飲詩集序

癸未冬。晤陸子筱飲于沌陽。得讀其所為古今體詩。予既喜見故人。而筱飲欲使予名附見于其集中。以志其合志同術之義。屬予編次而為之序。明年將遂歸錢塘矣。筱飲少負盛名。推本經術。足以有為。及科舉之文。屢不遇於有司。索米四方。東通齊北。走燕。留滯於楚。所過山川都邑風土人物。往往皆見之詩。其為詩也。則往往荒江醉臥。虛市夜起。踟躕乎秋風。徬徨於迴塹。每吟一篇。嗒然若失。嗚呼。此亦困頓無聊之所為作也。而筱飲夫且攤書對酒。掃地焚香。筆墨之娛。交遊之樂。無日無之。而不知其身之在羈旅也。惡知夫遇之窮。然不知其窮。故其氣定。其氣定。故其神和。其置力也常專。而優游以入其中也。常從容而有所得。聲音節奏之善。蓋有莫知所由然者。宜其詩之工也。嗟夫。詩之變也。莫不始於憂傷。而終於怨誹。大抵皆窮於遇者為之。故士之窮者常多。而詩之工者常少。或工於其辭。而其指未善。其指雖善。而語溢。

其分事失其真音流於激者皆詩之變也君子無取焉讀後飲詩者可以思其故已
後飲科舉之文清曠絕俗所在有名或一旦過於世未可知雖然若後飲者故不在
乎遇不遇也予獨怪論詩者知詩以窮而工而不知詩以窮而變知詩之工工於窮
而不知夫窮而不知其窮而詩乃工也故序次其集而推論之以告夫凡為詩者

通逸堂詩稿序

通逸堂詩四卷邵子鄭圃客吳中作也朱君布如得其稿本假予讀之而鄭圃適至
漢上遂與定交云鄭圃于書無所不讀慷慨善談論喜飲酒不拘繩尺平生於文章
頃刻立就初不屑意而詩獨刻苦為之朱君嘗與予言鄭圃為人豪放而詩謹嚴潤
跡衆人之中不避塵俗而詩清遠與人遇無復款曲而感舊書懷之作性情深厚讀
之惻然蓋不可測若是予以謂此鄭圃之詩所以工也古之作者莫不善變善變者
莫不攻其所難入而去其所可喜韓子之文疏通正大如其為人而其為詩縱橫排
奐光怪百出所謂攻其所難入也子厚屏跡荒裔感慨無聊不平之氣盡見於文而
其為詩古穆冲澹論者比之淵明所謂去其所可喜也是故詩之敝也莫患乎因其
性之所近興用其才之所長苦其難而無復入是恣其性而已矣得其近似而沾沾
焉自喜是任其才而已矣恣其性任其才初莫之變而詩未嘗不工者自鮑參軍李

翰林已下。不過數人。不然其弊將至於苟且率易。叫囂張皇。若明季詩人之互相雄長者。是也。然則謂鄭國之詩不可測。固即其詩之所由工也。與鄭國往來。江漢垂十餘年。與予交甚晚。而持論甚合。故言其作詩之指如此。抑聞之。嗣宗之放達。而通於易。杜元凱日在行陣。而長於春秋。皮襲美之詩。不過如陸魯望。而能尊孟子。董子之著玉杯。廣平之賦梅花。皆不復類其為人。而皆不可測。鄭國方且肆力於古文。變而不失其正。予又惡乎測之哉。

論名上

陳謨

讀范文正近名論已發明名之為益而破拘儒之見矣然第就在上者言似尚未盡故書此王章以補其闕

古昔盛時懸名以收天下之士而天下之士莫不竭蹶奔赴乎其間夫庸衆人之逐逐於利者固無與於名已其自中材以上知以言利為恥者一隆之以聲稱優之以品目則欣然喜躍然起有不期然而然者先王因其勢而利導之謂名不特非君子之所禁且亦有志者所緣強勉飭厲以循乎實之途也故樂得而寓夫振奮之權夫無所勸而為善無所畏而不為惡者天下富有幾人即幾人者祇不競乎名亦未嘗以名為累而思欲避而去之者也且其所謂名者果何由而致之哉周禮以鄉三物教萬民而賓興之曰六德知仁聖義中和也曰六行孝友睦婣任恤也即其次亦曰六藝禮樂射御書數也與乎此則父母樂之鄉黨榮之朝廷寵之不與乎此則父母恥之鄉黨賤之朝廷棄之是則名也者名其實也當世之名即後世之名也使天下人人而好名天下將人人而不失其實矣名何負於人哉孔子曰君子疾沒世而名不稱焉疾不稱則其樂有稱也甚矣孟子曰聲聞過情君子恥之恥過情則其於不過情者固以為宜然而受之無疑矣聖人之所以教人與明王之所以厲世夫豈有

二道歌

論名中

三代以降。政教日衰。迄於戰國。而寡廉鮮恥之徒。接迹於天下。歷漢三百餘年。黨錮諸君子。始競以名節自厲。唐宋明中葉。亦頗類此。雖其間用意過當。不合聖賢中正之道者。十人而五。而矯飾偽託者流。亦世所必不能無也。然而忠孝廉潔之誼。賴以不墜。其益為己多矣。斯豈非名之所致也哉。顧於此時。獲貶予奪之權。不操之上。而操之下。鄉黨學校之中。日陳斯人之行。而較其短長。有所善則雖寒素貧窶。終其身而儕輩為之推服景仰。俾發聞於遠近。而不之掩。其有不善。即以卿相之貴。勢力之雄。未嘗有所震懾委曲。而持清議諤諤。不可回也。自非中人以下。蕩然無復恥心之存者。誰則甘不齒於人羣。故夫名之所在。即利之所在者。君子不以近利而委靡頹廢。以自逃於名之外。名之所在。未必非害之所在者。慷慨好修之士。亦未嘗不強其所難。以避他人之訕笑。而就其稱譽之榮。然則先王之時。與漢唐宋明風俗之盛時。雖名於朝與野之不同。而所藉以維其實者。無不同也。奈何後世儒生。過為高論。動曰名非君子之所尚。嗟乎。名果非君子之所尚也。則夫誅奸諛。發潛德。史氏之筆削。亦何必垂法戒於將來哉。

論名下

漢唐宋明之季。安得有好名之人哉。有好名之人。吾以為必能其實者也。夫所謂矯飾偽託於名者。上欲以之市榮利。以肥其身。次亦以悅衆人之耳目。而取重於閭里間耳。二者無一有焉。則望望然去之矣。夫漢唐宋明之季。其朝之上。寵榮顯貴焉者。無非佞邪無恥。決裂禮教之徒。而鄉閭人士。亦遂習以為風。父勉其子。兄勉其弟。曰識時務者。呼為俊傑而已。於斯時也。一有持清操厲廉隅之士。出乎其間。衆且非笑之。嫉惡之。而俾斯人無所容其身。是即質勝中人。平日感發於讀書稽古。命意較然。一旦涉歷世途。身當況味。亦且退然自沮。思所以貶志改節。而不櫻流俗之忌矣。又湯矯飾偽託者。流其揣摩最熟。其營求最巧者哉。然則嚶嚶自負。知慕乎古。不知慕乎今。欲附聖賢之譽。恥為庸惡之歸者。豈非所謂衆人皆醉我獨醒。衆人皆濁我獨清者乎。雖或其學問未底於純粹。言行未能以相掩。而其拔俗之概。視猥瑣齷齪者。已不啻霄壤之於土壤。能其實者。舍斯人誰望焉。則使孔孟而生於斯。必將引以為徒。而獎勵樂育之。不謂誦法孔孟者。執其迂拘之見。而一以好名斥之也。夫儒先之言曰。甯與聖賢爭理。不與流俗爭名。特是好名而櫻流俗之忌者。則其所好之名。即聖賢之理而已矣。吾願誦法孔子者之審之慎。無與矯飾偽託者流等類。而齊觀焉。

爾

龍湫山人像贊并序

潛夫李先生自甲申後遷跡龍湫山中。髡其首。被闌黎服。自號龍湫山人。屏足不入城市。感慨抑鬱之氣。一寓之詩。高風峻節。奕世下猶凜凜焉。當是時。吳郡徐侯齋先生。海鹽巢端明先生。并吾邑馬彝仲先生。與先生共四人。數百里中遙相望也。皆前明舉人。未嘗食朝廷之祿。服朝廷之官。而君臣之義。無所解於其心。至於凍餓且死。而未始稍變。抑亦可以繼夷齊而為百世師也已。余嘗謂治平之時。無所謂隱士也。其謬託為隱士者。非怪迂者流。即清閑自適之子也。惟夫變故忽遭。義既不得。如有官守者之死。而又不可如尋常之民之樂而生。則含酸茹苦。瘁其體膚。以求不欺於心。其斟酌非苟然矣。余親明末一時逃爵祿。服居士服。未幾造謁王侯卿相之門。則又謬希隱士之名。而實鄙夫小人之無所據者爾。四先生輩必惡之。訾之。而不屑聞之。四先生中。侯齋先生及先生名尤盛。士林雖頑懦。亦各競相欽仰。蓋人心之公。不可泯也。況忝為同里後學。且稍知自飭者乎。丁酉春正月。先生之從曾孫某。懸先生像於中堂。謨過之。謹再拜而為之贊曰。

其貌清癯。其意嗟吁。何我生之不辰。值故國之為墟。雖未嘗析珪而擗簪。亦已曾名

列乎賢書其不為仕宦者所以報舊君之養士其不為激烈而自戕者知堯舜在上而能容夫巢由之徒爰屏迹於草野甘凍餒而寂居嗚呼先生之殒於今蓋一百十有餘年矣猶使人展其遺像而為之懷然自飭夫廉隅

邈雲三編序

薛著廷

自余居京師七年。慎擇交遊。故新知者特寡。獨于吾秦中獲二友焉。一為李子西京。其一為詩人楊君子安。君為潼關函東先生曾孫。世以詩業其家。至君而益大。起家進士。再出宰。輒註吏議。今復官湖南。資廉祿以養。又重賦悼亡。膝下僅兩弱女。其遇不可謂不窮也。然其詩愈益工。其在都。與西京共棲僧寺。西京性豪邁。善書喜客。戶外之屢常滿。言偶不合。即怒而大譟。君文弱如不勝衣。終日閉戶焚香。丹鉛不去手。其操性不同如燕越。然而相得甚歡。酬酢之辭亦甚夥。余兩善之。而皆未之能學也。兩君皆不能飲酒。或為余設尊。間出詩文相商榷。談諧至夜分不倦。因有偕往華山之約。余笑而諾之。未幾。西京出宰肥城。君亦將涉湖湘。而余先以大考去官。就浮家於山左。旬月之間。襁被四出。顯晦殊趣。視曩時之談空說有。酒碧燈紅。茫茫如隔幾塵矣。夫以京師人才都會之區。而交道之難如此。一旦時過境遷。邈焉不可復追。況使兩君出求之一郡一邑。而余歸求之一鄉。其可得耶。西京之詩壯健有奇氣。如其為人。君詩工於言情。密於律法。平生宦遊半天下。身所閱歷。學與之進。一切感事情。人榮悴悲愉。皆以發之於詩。邈雲初集梓行已久。近於巾箱出三編。屬為論定。余乃備詳交情之可感。以贈行。即以為序。蓋余與君之投分。非徒詩也。宋張忠定公遇華

山希夷先生曰。子神仙中人。然失火家。方待君救。可不赴耶。君志篤於遂初。而勢有未可。勉以答楚人之望。余方謀筆耕養親。以待君。他年倘相遇於蓬華仙掌間。當煥除語言文字。相與探性命真源也。并寄訊西京。以為然否。

南林張君墓誌銘

嗚呼。萊峯張君之與余。如唐韓宋蘇之同值磨蝎宮也。今則生並世而同里也。學同師也。癸酉鄉試。不同榜而同舉省試。廷對。皆同丁丑也。余官廣文二年。在翰林七年。而君為邑宰至數。左辟學職。未上。余以此始。君以此終。皆潦倒終無所就。又周不同也。同方同術。而好會曰淺。今年同客膠西。談燕者累月。而竟恤恤焉。問其疾。視其含餽。諾公子之請。而預銘君墳。樂未極而生悲。尤事理之至常而至奇者也。君家武功。去雒南五百里。未由相識也。歲庚午。余入關中書院肄業。主講者孫西峯師。而君以鄉里負笈從。論文會講。晨夕觀摩。屢自夏首迄秋之半也。咸進士後。君歸班。迨守部需次之時。而余已罷歸。出入相避。動如參商之不相見也。君通於學。而寡於仕。初授西粵之修仁。再補吳興之德清。中間南北奔走。勞苦顛頓者。行數萬里。歷二十餘寒暑。而兩任曾不滿一歲。其坎壈視余尤甚也。失意於上官。不必調而調。不必送部引對。而咨送入都。皆非人之所為。而不必致憾於臧氏之子也。然君乘寬閒之歲月。

薄宦壯游。西至蜀。南極瘴鄉。往來吳越荆豫。以至燕趙而終老於齊也。山海足以供其雕鎔。悲愉足以發其精彩。萍礪而強滌之。又安知非天之玉汝於成。而將以大昌其詩文也。文宗八家。而以左史堅其骨。詩湖三唐。而以騷選疏其氣。蓋已哀然成集。而卓乎可名一家者也。嗚呼。富貴者天之所輕。而獨若斯人以名然。於兼得者。愈思有以撓敗之。如君之抑塞於生前。而彰徹於身後。人所不忍。而造物且或為之寬假也。君幼而穎特。長而敦敏。與人無町畦。而善善則長。達於政事。綽綽而鬱不得施。澤未被於民物。為可悼惜也。罷官不歸。久客齊魯間。掌嶧縣膠州書院之教十年。皆以小阮德潤君為東道主。正身率士。經指授者多。騰達以去。而興學擇師。共戴使君如丈翁高朕。信其匪藉公帑以優給私親也。君之疾也。妻子護之謹。其歿也。親賓門弟子哭之哀。辨香翦紙。陳牲而酌酒者。經月不絕。尊其教而欽其德。固不徒門牆之髦俊也。君之名曰洲。字萊華也。又自號曰南林也。卒之歲丁未。為乾隆五十二年七月廿一日。絳甲初周。而不至生之辰者兩月也。考曰。文學金貞妣楊氏。繼母馮氏。覃恩贈封正七品。如君階也。配康氏。系出對山先生。以貴且賢。得附見也。子樹楠。縣學生。孫照著。將奉母扶靈輜以歸。而奠諸佳城也。祖以上世次名行。見於酉峯先生所為贈公墓誌者。不再詳也。嗚呼。余與君生平遺際。十同六七。則文筆雖拙。而銘君者。

誠莫余宜。倘亦君之志也。銘曰。

物之用。當其無宰官耶。迺文儒雲錦段。明月珠。執經心。濟史。變齊魯。春風。敷竹林。
執帶草紆。我之來。暮酒娛。作元晏。丹黃幼。事未竟。鵬坐隅。靈之殿。召而起。神超越。柅
載塗。柳翼導。經杖扶。武功天。杜粉榆。聽楚些。盡歸乎。

國朝文匯乙集目錄

卷二十九

彭光斗

字貢國號退庵江蘇溧陽人乾隆己卯舉人官知縣有雲溪草堂文鈔

六國論上

六國論下

芮處士傳

段烈婦傳

錢青選

字履巖號澗石江蘇陽湖人流寓雲南

方孝子傳

烈婦楊氏傳

黃紹統

字燕勳號翼堂廣東香山人乾隆己卯舉人官瓊州府教授有仰山堂集

古羅崇愛編序

明經李樸庵墓誌銘

張遠覽

字偉瞻河南西華人乾隆己卯舉人官鎮遠縣知縣

理君安和傳

劉秀才傳

九

為山先生傳

十

張可庭先生傳

十

劉公祠墓碑

十一

李彥平墓誌銘

十二

胡望溪墓誌銘

十二

胡賡善

字受穀號心泉安徽歙縣人乾隆己卯舉人有新城伯子文集

江孝貞女頌

并序代金司勳

十四

書胡孝子事

十四

方君睇原權厝誌

十五

張

望字履壇號聞樞江西武甯人有聞樞先生集

原命

十七

茂才

十八

鄉治

十八

知人難

十九

堅垂問

二十

送魏梅山歸龍津序

二十一

盧大夫傳

二十一

追葬鷺渚序

二十二

吳高增

號敬齋浙江秀水人著有敬齋集

遊柯山記

二十四

曹文植

字近菴號竹庵安徽歙縣人乾隆庚辰進士官至戶部尚書諡文敏有石鼓研齋文鈔

崇樾鮑氏宣忠堂支譜序

二十五

非園自記

二十五

遊黃山記

二十六

國朝文匯乙集卷二十九

六國論上

彭光斗

昔人或咎六國以割地賂秦而亡。夫豈然哉。余謂六國之亡。自亡也。非亡於賂秦也。土地者。諸侯之大寶也。賂人者。人主之大辱也。無故輸大寶。冒大辱。自速覆亡之實。禍六國雖愚。不至此。然則其賂秦何耶。曰。彼將以救亡云爾。里人有擁萬金之產者。昏夜巨盜踵門。燭其廬。將繫主人而戕之。環顧僮僕鄰里。胥惶駭辟易。莫敢救。即救且不免。不得已。分與金帛。為好言以款其去。亦情勢之常。宜無足怪。吾又嘗歷考戰國史記諸書。見夫諸侯之地。入於秦。秦以兵力取之者。十八九。諸侯自以其地獻者。十二三。而惟魏居半焉。蓋魏地近秦。秦不得魏。則上郡關中之險與魏共。不能扼吭以制山東。以故魏被兵於秦。迄戰國無甯歲。一大敗於衛鞅。而河西獻。再大敗於白起。而安邑獻。三大敗於穰侯。而南陽又獻。蘇代云。以地事秦。猶抱薪救火。薪不盡。火不止。此言特為魏危之。然魏固無如何耳。他若韓與趙。一再賂秦。楚屢構秦禍。亦僅再割地予秦。齊事秦最謹。未聞割地。燕獻督亢圖。在垂亡之日。並非魏比。然則六國未嘗概以賂秦為事也。而論者猥執辨士一偏之說。譏其不戰而亡。過矣。且即以賂秦論。亦未可遽指為亡國之計也。昔文王獻洛西於紂。而周以興。勾踐掃境內事。

吳而越終霸韓魏之先不拒智伯請地卒滅智氏而分其國老子云將欲奪之必固與之獨不聞曩者秦亦嘗賂六國乎孟嘗之師一叩函谷遽從樓緩議割河東三大縣以講於諸侯當此時也秦方惴惴焉慮六國之亡己也究之秦不亡且能亡六國則吳割地不足以病秦夫割地不足病秦而獨以病六國亦多見其好以成敗論人而已然則六國何以亡也曰六國徒知賂秦可以救亡而不思自固其本其君臣上下惟晏然以偷安縱欲為事而又興兵構怨互相樓伐猶抱已死之症加急劑焉是之謂自亡也已自亡者安往不得其亡而豈繫秦之賂與不賂哉

六國論下

療病者方也為方者醫也昔者嬴秦恃其強大為六國害諸侯王於是會於洹水之上共議擯秦約秦伐一國則諸國出師救之當是時王侯將相咸拱手奉約唯謹秦亦不敢遽出兵窺山東天下稍安是合從者固六國救亡之良方也而其合之不久則以蘇秦為之醫天下有良醫焉其視人病先審其致病之由為表為裏以藥投之不再劑而其人霍然無復患苦夫六國之易散難合何為乎病不在外証而在內潰也其所以內潰由利害之說構之也構楚者曰君曷嫁害齊者曰慎勿利歸楚構曰積則釁日開釁日開則樹敵多而勢益孤秦伺其孤而多敵則媒彼間此使起

己者轉而親己。畏己以陽關六國而陰制其命。此內潰之禍也。為蘇秦計。力能大合諸侯。宜正告以先王睦鄰之誼。次動以吉凶同患之情。毋貪伎以啟爭務。敦信以全好。使六國坦然如骨肉之不相忌。則不靳擯秦而秦自擯。何必身主敦槃。騰書函谷。以虛聲相恐喝哉。計不出此。觀其所與羣侯言者。仍無過怵以害而啖以利。譬諸人方病狂反。飲以發風動氣之藥。其狂將益甚矣。故合僅一年。而秦遂誘齊魏伐趙。且夫發合從之議者誰乎。吾能發之。必能收之。當趙受伐時。秦固儼然在趙也。誠如燭之武之救鄭。挺身往說。齊王曰。趙兄弟之國。不可伐。背盟者不祥。臣恐天下義兵。羣指於齊矣。且王母以魏解也。魏弱遠秦。其畏秦而唯所驅使。曷怪齊固與秦兩大。諸侯王無不延頸踵踵。樂奉大王之高誼者。一旦冒不韙之名。效弱魏之醜。臣竊為王羞之。且趙亡是齊自撤其蔽。不亡而地亦半折於秦與魏。王特以空名市實。禍甚非算也。大王幸聽臣。按甲不進。魏必不敢獨助秦。因與趙合而擊秦。天下聞之。咸多齊不受秦欺。亦共起擊秦。則此一舉而脅魏抗秦。全趙伸大信於天下。桓文之烈。不過矣。能如是而秦亦庶幾轉敗為功者矣。胡乃詭辭脫禍。來往燕齊。卒未聞為趙畫一策。史稱秦智過人。吾不信也。昔魯仲連客趙。秦圍邯鄲。急趙議帝秦。仲連聞之。往折辛垣衍。却秦軍五十里。彼一布衣而排難解紛。義動王侯。若是曾謂躬佩相印。為從

約長者說力反出連下哉嗚呼。合從非盛世事也。而六國賴以救亡。君子猶取焉。不幸所任者秦。始既謀之不臧。繼且委之而去。從散約解。終戰國不能復合。以迄於亡。諺云死病無良醫。信夫。

芮處士傳

邑故處士芮城字巖尹。農家子也。幼隨父過村塾。聞羣兒讀書。繞一編。各為覆誦。如流。乃令就學。補縣弟子員。旋食餼。是時明社將亡。流寇訑海內。惟江左半壁晏然。知名士方盛。修壇坫。互相標榜。而城獨與同邑陳名夏。趙理之。吳頴彭旭。史燧。馬世傑。世俊等。合社講學。以忠孝大節相切劘。稱瀨上十三子。會甲中之變。城日偕諸子哭臨縣庭。嗣聞京城破後。朝臣或遁或降。而名夏官給事中。亦污偽命。則益悲咤忿忿。恨不獲以布衣殉國難。而又惜同學之守節不堅。為桑梓玷也。爰賦滄浪吟數十篇。且歌且泣。傍徨澤畔。聞者擬諸謝舉羽。西臺之作云。福藩稱制。捕諸從逆者。名夏逃歸里。詣城。城面壁臥曰。君亡不死。安用子見。名夏跽且哭曰。嘗再縊。不幸為救者。誤。城厲聲曰。胡不三。亟麾令去曰。吾不忍鳴汝罪也。城自是遂與諸子稍稍異。尚獨行其志。及我朝受命龍興。諸人多以文章勲業奮跡自庸。而城已謝諸生服矣。既名夏枋中樞。屢專使以大魁招城出。不應。隱居荒野。幅巾裹髮。終身弗變。初名夏之

歸自北也。彭旭率同學攻訐之。過後修郤。將中旭以法。既成獄。適奉敕來江南。城乃乘肩輿往而扁其外。名夏喜。遽出迎。叩何言。城隔帷語曰。從公乞彭旭耳。名夏立應諾。釋旭訖。不一見而返。城高才。於書靡不讀。嘗有賈挾二十一史。截僻句挑之。城應聲指卷頁無一錯。賈不取直而去。一異僧自遠方來。博辨罕對。比推七十三甲子。溯麻元僧大數脈。乃下拜。或曰。僧故崇禎朝名進士。隱於浮屠者也。城之學博而能醇。經史疑義。考證尤精。具載匏瓜錄。他著述尚廣。多散佚。半為人更名刊布。其沒也。前一日。階前紅牡丹花盡白。

論曰。余童年謁里中鄉賢祠。見芮先生名。哀然首列。心竊異之。長而讀其文。訪其生平軼事。乃知先生固以處士終者也。夫先生之志節矯矯若此。設早通顯於世。成仁取義。當婉倪馬諸公。並光國史。甯僅以處士俎豆一鄉哉。然吾意陳公有知之。轉悔不為處士也。

段烈婦傳

余來京師。聞中川有段烈婦云。烈婦盧氏。少歸段。籍隸河南延津縣禮鄉村。家貧。夫傭食他往。久不返。氏獨撫子女紡績為生。所居泥棚二堵。堵以外皆隙地也。同里有無賴者。瞞氏子處。數數往挑。不應。遂於昏夜穴牆入。氏驚起。叱之。急手掩氏口曰。非

偷也。勿叱氏怒。嚙其指。無賴者負痛。碎而搯之。壁隅氏氣結。徐吐指云。姑釋我。及起。則抵捍益力。無賴者知不可奪。憤甚。攬繩束其喉。三市之。復取絡柱鉞。連刺氏腹。乃死。迴顧小兒女。踞炕鳴嗚。慮其啼也。並斃之。牀未幾事露。具獄奏聞。敕建坊旌氏。而磔無賴者於市。時乾隆十八年季秋朔也。氏死在是年春。里民走報縣尹尹驗。知非盜。顧莫得殺氏者主名。為默禱於神。會月食夜。與同官禮護畢。隱几微睡。突見一馬人立而語。矢貫其胸。覺異焉。適奉文派夫濬河。乃往取村戶版籍。按名覈之。至第七人曰許忠。尹心動。得非若耶。蓋許為午言。午言為馬語。矢貫胸則忠字也。諦見許兩手伏地。其一踣曲袖中。令出視。有片絮裹指。啗痕宛然。裸其體觀之。則自項及胷脊股掌間。爪迹參錯。莫可數計。一訊吐實。始悉氏死時反覆抵拒狀。而獄定矣。傳其事者。淇令江右周君燠也。周又為樂府四卷行於世。號中州悲烈紀。

論曰。伊古婦女守貞。不為彊暴汙者。首稱召南行露野鷹兩詩。然余觀其時。江漢化行。人知重羞恥。即間有雀鼠輩。得毅然援禮義以絕之。以是數古之為貞女者。猶易也。輒近風氣日媮。民之縱欲。狂狠彌甚。悲哉烈婦。以一孱女子。與兇徒相格於風雨晦冥之時。而乃鄰犬不聞。死鹿被束。百端抗拒。至力竭氣殫。甯受屠毒。不辱以終。可不謂難焉。按延邑近淇。淇故所稱桑間地也。烈婦處茲土。節操獨凜凜如是。則豈非

漸靡於
聖世之德化者深故堪與南國貞姬媲美哉被諸管絃以當房中雅奏宜
已

方孝子傳

錢青選

方孝子者。姓董氏。名盛。祖雲南黑鹽井細民也。以其幼寄方姓。呼之曰方孝子云。盛祖樸誠。不知書。早失父。事母純孝。凡起居寒煖。飲食事奉。必躬親之。無少懈。母亦甚安之。非盛祖不適也。盛祖業賤。無兄弟。一妹嫁里中。常往來省視。出則呼其妹。以母屬之。妹亦能先意承志。如盛祖如是者。以為常。蓋數十年如一日焉。盛祖嘗晨出。行數里。有蛇當其前。驚而却。頃之。蛇乃去。復前行。里許。則蛇又在焉。盛祖懼。愀然曰。是必吾母病喚我矣。急歸。則母果病臥。方喚盛祖也。自是遂不復出。及母卒。哀毀逾常。人一日晨哭。頓絕。鄰里驚救之。始嗚咽而甦。眾咸感歎。比葬。手聚土石。馬初盛祖有妻而早亡。遂不娶。或勸之。盛祖慨然曰。娶婦以事親也。顧賢者實難。脫其不賢。將戾吾母。吾能安乎。且吾常見吾里中之婦矣。操箕帚。執炊爨。作苦克家者。猶往往難之。求其與子一心。順旨承顏。疾病疴癢相關者。卒未之聞也。今吾居則事事親奉。吾親出則有妹以代吾役。使吾母得安其天年。乃吾事畢矣。又奚以婦為。終不復娶。未幾亦病卒。竟無子。包學海云。

贊曰。孝子可謂終其身孺慕者矣。雖無矯矯驚俗之行。可不謂賢歟。或曰。不孝有三。無後為大。孝子以不再娶而卒無子。母乃戾于古訓歟。是又不然。孝子固愚。不知書。

者也。亦行其心之所安已耳。顧安知不娶無子之為非耶。乃其妹者。又能以其兄事母之心為心。而事其事。亦加于凡為女者一等矣。

烈婦楊氏傳

烈婦楊氏者。滇之黑鹽井人。楊顯科女孫也。生三歲。父母亡。祖父母撫而長之。年十六。字井氏。何自榮。自榮貧無恆業。父子惟力作自給。氏亦辛勤左右之。居三年。無怨色。既而自榮以病瘋。目漸盲且廢。至不復能人。氏亦安之。無少異也。鄰里以氏之賢而勤於力也。相與嘉歎。或稍資給之。蓋有借于氏之傭作。而氏亦獲資以濟其難。如是者數年。氏年二十有四矣。自榮憫氏窮商嫁之。氏不應。既成約。氏微聞之。奔告其祖。祖謂之曰。夫在而嫁。非訓也。然汝尚少。無子女。今即自存。將何所終託乎。子老矣。恐不能恃。汝自主之。因聚泣。氏遂含涕歸。初氏之告其祖也。蓋猶冀其事之未必然。或既然而尚可回也。及聞祖言。知莫與為力。志乃定。至期。媒來促。氏方磨厲畢。返自鄰。望見輿。從且至。乃大呼哭曰。兒有夫也。雖殘廢。願卒守之。奈何以兒再嫁也。急出戶。躍身投于河。救者攬其裾。氏頓絕。赴激湍。值水方漲。瞬息隨流去。以死。時乾隆四十有八年癸卯七月初二日也。獲尸於井北境之葫蘆潭。顏色不少變。

論曰。婦人多輕生。然死得其正。則生輕而死重矣。烈婦之以烈見也。蓋其遇為之孟

子云所惡有甚于死者。氏庶幾似之。可以風矣。雖格于例。不得旌。詎終湮沒哉。抑又聞氏之死也。去盧二姑事方一甲子。其死之地與日月則又皆同也。宜偶然哉。余既悲其遇。嘉其志。又感其異。是以流連興歎。為書而傳之。而不能自己也。

古羅棠愛編序

黃紹統

石邑為古羅州地棠愛編者邑人沐邑侯喻公之澤誦公之詩如對甘棠也邑人愛公久誦公詩而樂和之以誌愛戴之私故曰古羅棠愛也公之詩何為而作也歲丁酉邑大旱民大饑以偏災故格於例不獲上聞公惻然為斯民憂日夜籌救荒之策自昨之冬至今之夏寢食不遑賑糴施借事事躬親城鄉遠邇區畫井井凡卹荒善政靡不舉四境帖然至是民困稍甦公益憫彫瘵哀此離引咎自責作詩見志復念諸勸事者數月之勞惠詩以謝之嗚呼公之心盡矣公之澤厚矣公之詩於是傳矣邑人誦公之詩欲名其詩而不得比之甘棠志不忘也昔召伯有棠而無詩有棠則詩不作可也蔽芾之章國人自詠之也公無棠而有詩有詩則以詩為棠可也邑人和之一蔽芾之意也或曰公之棠無乎不在也公蒞石未三載政簡刑清廢墜具舉新贊序而堂廡奕然葺文昌廟而學舍秩然培龍嶺土種台山木復文昌橋山川之色盎然凡吾儕觀瞻所及登臨所至無地非公棠也何獨詩余曰公之棠無地不在也以詩為棠吾知公之棠無時而不有也公為邑千萬戶而作詩邑又為千百世而傳公詩以千百世內千萬戶之人皆獲見是詩父老子弟務農力穡三年九年蓋藏充積雖有木饑水毀不為災熙熙然曰歌舞於閭井桑麻之間而棠之庇遠矣邑

國朝文匯

卷二十九

七

國學扶輪社印

人題余言。因并請余與羣公所和之什。彙集成編。付之梓人。而以余言弁其簡端。

明經李樸庵墓誌銘

君姓李氏。特秀名也。論升字也。樸庵其別號也。孝莊門人所私諡也。邑增生諱王會者。考也。邑增生諱進之者。王考也。處士諱攀雲者。大王考也。儒學訓導。君所候選者也。孺人黃氏。其配也。邑學生曰安者。其嗣也。曰陳繹珍。鍾崑章。諸生葉蕃。黃友瑄。君之四子壻也。壽六十有六。康熙癸巳六月廿七。乾隆戊戌五月廿七。君生卒之年月若日也。君幼而穎敏。早通詩書易三經。少從其伯考愚山先生學。舉子業。嘗期以國器。在諸生中數十年。文詞修潔。學識醇深。輒為學使者所知。拔置高等。然訖困於場屋。晚而以明經應補師儒之官。非其志也。雅負至性。少孤。恨無以養厥考。奉母孝謹。嘗侍疾。寢食不違左右。中帶廁。親自泔滌。與其仲同居數十年。分甘潤寡。友愛怡然。生平廉介自持。不營求非分。終身粗衣糲食。晏如也。舍旁嘗構一室。竹窗素壁。階前雜蒔花木。授徒其中。時展卷風簷花徑下。翛然自得。非慶弔親串外。足不踰鄉閭。間與族鄰款接。溫恭謙謹。羣飲其和。若鄉曲以事就商。手指口畫。裁決悉當。不為世俗和光之行。尤喜周人之急。聞有陳某者。鬻其女於遠客。券成歸金矣。臨歧。父女哭別甚慘。君廉知之。願捐金代贖。客轉以敗約讓君。君曰。市人子女。非販他物。比賄斯

景況堅要前約。心能忍乎。客悟。領金還女而去。其隱德多類此。聞君好談理學。嘗謂
吾輩當以真知實踐為事。不以詞章見長。今綜厥所為。庶幾知道者。余司訓此土十
餘年。僅一面晤。益然有道之容。噫。亦可風已。為之銘曰。

開塘之麓。林木鬱蔥。發祥有自。溯厥宗公。百世松楸不改。宜為君子之幽宮。

氣平居凝塵滿榻。琴書顛倒狼籍。鼠噴噴竄其中。檢書時若恐驚之。有避之。遊未嘗辭。置酒則醉。遇可與言者。輒醒。頭經月不梳。衣無美惡。敝不補。垢膩常滿。行市中反手入衽。撮虱擲於地。蠕蠕然。然為人白哲。眉目如畫。人未嘗見其讀書。叩之淹貫淵博。莫能測也。初先生既被放。遠近皆慕其行。多遣子弟從之。所得束脩甘旨。潛託三弟獻其父。時或不得通。則循牆走泣。且望見之者。莫不泣下。其枕旁為淚所漬。久而盈尺。皆殷。八年就吏部選。京師地震。死者甚衆。先生遂不免。今禮部侍郎鄒公一極奔哭。歛賻甚厚。歸其喪於西華。其父乃痛而復甦曰。嗚呼。奈何。吾有孝子而早不悟也。所著詩雜文多亡。今存者不十篇。子佳忱。

後學張遠覽曰。余生不及見可庭先生。然時酌酒於先生之墓。又獲拜先生之夫人於堂。不自知涕泣之何從也。余猶記三四歲時。一日夜將半。叩門聲急。既而先君子哭甚哀。家人皆哭。則先生之卒也。於是知先生與先君子。蓋兄弟交云。後時時從士大夫長者。問先生軼事。而遺文彫落。緘述無由。夫以先生之行。而所遺之酷。至於如此。何怪夫人之致疑於天也。然先生歿且三十年。而風流宛在。泯泯者蓋不知凡幾矣。悲夫。

劉公祠墓碑

國朝文匯

卷二十九

十一

乙 集
國學扶輪社印

公諱伯驥字遇伯河間貢生為人明慈好禮而有氣以崇禎十一年為西華縣知縣是時河南盜方熾民窮且餓而劫奪無甯日公內推德惠以撫難民外嚴守備以禦悍寇夜親持刁斗坐城樓上督守陴者至忘食左右奉之曰民困且死吾食不下也縣人皆感奮以死自誓賊屢攻不利輒引去不敢窺西華十四年正月河南府陷李自成殺其帥自立為闖王并其眾以劫汴以東九月屠項城商水越西華屠扶溝十二月陷洧川許州長葛鄆陵皆逼近西華乃去攻開封公聞即遣夫人公子奉太夫人歸河間縣人皆泣曰公不歸矣明年正月襄城陷知縣曹思正死之遂攻西華公帶雙鞬握大刀登陴固守有勸降者立斬以殉賊望見怒驅其下為十覆迭攻之數日援不至城遂陷公乃釋胄易朝服內印綬於懷北向望闕拜並遙拜太夫人自投井中死縣人葬于東門之外公子福清來迎喪縣人號哭不許至我朝康熙初去公死時三十年而福清為鹿邑知縣有賢聲西華人曰我公之子也相率而省者不絕於道祠成于康熙八年舊有碑公之始末未詳也余故考述其事揭諸道左俾後人屬耳目焉時乾隆二十年十一月長至日司具工者縣尉李君大成君亦河間人銘曰

天以劉公賜我敝邑不先不後值事方蹙乃衣乃粥乃浚乃築既惠既嚴斯歌斯祝

狼嗥鵠嘯。其來飄忽。外援不至。內計何屬。北風肅肅。葭葦冥冥。流者人血。哭者鬼聲。公髮上冲。公氣上騰。刀迅如霆。矢疾如蠅。擊鼓其鐙。百雉已傾。脫我戎服。衣我朝衣。冽彼寒泉。臣之所歸。皇天后土。二祖列宗。寄臣此城。臣敢每生。臣力已竭。皇照臣誠。狂賊未殲。臣目不瞑。縣人興尸。其哀轟轟。公子來迎。萬人是爭。公仁我人。我親公境。奔走如雲。作廟以禋。生為國士。死作國殤。青松白楊。忠魄是藏。樵採是禁。俎豆是將。神風靈雨。芳馥滿堂。其降洋洋。哀衣繡裳。豈伊異人。前令此邦。

李彥平墓誌銘

嗚呼。彥平竟夭。彥平姓李氏。諱原。余字之曰彥平。太學生恩齡之子也。生三年而母程夫人歿。其繼母張夫人。余之從妹也。既於彥平慈。而彥平遂以孝聞。年十八。遭父喪。時方以危疾昏。不知人。後病稍蘇。杖而起。哀慟幾於死者數。喪繼母。毀又甚。於是遂多病。顧好讀書。而勤於善。弟篤慶。張出也。彥平友愛無不至。篤於朋友。久而益新。先是彥平從金簡秘周恆山丁敏吉三君學。三君皆稱之。又學於余之門人王耕舍。耕舍嘗謂余曰。原也。娒厚而心沈。是不易得。夫子幸有以教之。則其成也可必。今年春。耕舍之京。彥平遂委其家事於篤慶。而來從余。其意拳拳。惟恐不得當。蓋其所欲得於余者甚奢。而余顧愧其無所裨於彥平也。乃一病百餘日。遂至於歿。時為乾隆

四十四年十月五日辛卯得年三十有一娶白氏贈文林郎賜功女子二締結即於其年十一月四日甲申葬於其父墓之左篤慶服哀來謁曰吾兄之歿同學二三子哭無不失聲相與謀曰是惟請夫子銘其墓彥平雖死不死嗚呼何忍不銘昔者彥平請銘其父墓猶如昨日而遽以銘彥平安得不有餘悲銘曰死已數既不死宜可淑秋風暴促春旭我為銘聊當哭

胡望溪墓誌銘

嗚呼望溪歿而葬其孤來稽顙請銘其墓曰亡父臨歿囑請銘于夫子且曰昔者葬吾祖夫子為銘今我門弟子也汝並不必為狀知弟莫如師夫子必許我嗚呼望溪姓胡氏諱景濂望溪字也祖崇修所稱偉喬先生即余銘其墓者子光燕無子以從子光勳之子景濂為之後即望溪也望溪為人心小謹畏少無子弟之過長慕敦篤之行自期甚奢而力恒退然若不勝顧篤于學而尤好余之所為文余所為文輒散去不自收拾而望溪每遇一篇輒錄而弄之其按羅校讐不遺餘力余文之足存與否不必論而實賴望溪而存嗚呼余之所望于望溪者安在而望溪懇懇于余者即是可感也望溪生於乾隆三年十月丙戌卒於嘉慶元年九月戊申得年五十有九以縣學生終娶張氏子二應殿娶于凌應恭娶于王女子歸王九寬明年四月丙子

葬望溪于其祖墓之左。嗚呼。余昔者銘其祖墓。今銘望溪。銘人墓三世矣。以此思余之于世也。不其亦久矣乎。乃為銘曰。

嗚呼望溪。是為墓之銘。墓中人兮如生。我銘斯徵。

江孝貞女頌 并序 代金司勳

胡廣善

昔松江汪文學洪度。作女史徽卿閨貞淑志錄畧備。其以女子未嫁而守死成貞義者。邑有三人焉。曰吳淑姬。曰蔣女。曰程女。淑姬吾鎮人。少字潭渡黃夢柏仲子。是遊學客死。淑姬往弔其歸喪。服斬如禮。哭盡哀。既事入內寢。一夕自經死。蔣村人其所字者為槐塘程繼濂。繼濂從其父賈長沙積二十餘年。斷絕音問。父母數欲改字之。蔣固不可。鬱伊成病死。程繼濂之族也。而字蔣氏。蔣氏家竭田死。問至。程赴喪。弔哭歸輒自經。用母教不得死。獨居鍵樓戶。絨紉自食。幾三十年。乃死。金子曰。以余徵之孝貞江氏女。猶信江氏女者。邑人其父嘉桂。故與楊某姻連。楊有子嗣立而慈嘉桂喜字之。已而嗣立死。赴告及嘉桂。嘉桂夙奇女志趣。猶豫未忍發。然卒莫能秘也。女聞則大慟。欲死之。嘉桂泣曰。若無然。雖然何埤于嗣立。嗣立之父母在也。不可往。若家終婦事乎。女乃泣而往。見祖姑。則祖姑老矣。見其姑。則姑病。且不知人。臨嗣立之喪。則塊然孑然。一慟幾絕。曰。已矣。滋欲死之。具。楊父泣曰。若無然。雖然何埤于嗣立。嗣立之兄弟在也。不可冀立孤終若義乎。女乃泣而止。比死。嗣立之兄弟各以其子為之子。蓋女自之。楊氏十有九年。所以事姑者。一以艱貞濟其孝。其姑始猶暴遇之。久而習安之。又久而惻然覺悟。悽然悲泣曰。若吾婦耶。婦如是。吾不復苦思亡

子矣。是故嗣立之兄弟各以其子為之子者。義感致然也。金子曰。孝貞事與吳程二女頗相類。雖死生之際。遺值各殊。然皆能以義自完。其歸一也。江之父母。則賢于蔣氏遠矣。乃列序而頌之。無令史微專美于前。載頌曰。

吳將慷慨。程女從容。之死靡慝。志義則同。維江之媛。前烈比蹤。既貞既孝。聲悅斯宗。匪惟聲悅。乃古之英。閨門夷叔。巾幗白嬰。用寡存孤。伯道復生。於世萬萬。不隕清聲。

書胡孝子事

孝子與余為同姓。名如楷。孔堂其字。厥考例監君肖巖先生。諱對揚。娶于畢。而生孝子。例監君之考曰正履。康熙庚子科舉人。卒官山西高平知縣。文辭瓌璋。傾動東南。與邑中葉孝廉嘉桂齊名。學者所稱。坦又先生是也。例監君繼承家學。思益迪前光。而性故豪蕩。不羈。自為郡文學。屢赴江甯鄉舉。而屢躓。則北走京師。以鄉學生援例入國子監。就順天試。復不售。既散。展科名。委蛻家室。又頗聞岷峨之勝。遊興勃生。即次西行。展轉入蜀。雖一紙家書。夷然不屑也。孝子方韶齒。固已知其父在客。請往尋求。而未得命于其母。于是歲在鵠首。例監君之出也。凡十有二載。而孝子之生。亦十有七齡矣。乃心思父逾亟。夙莫治行。不可復已。母亦撤簪珥為資。是用辭家西邁。迺流漢荆。微聞其父之在蜀也。則託故友還書以白其母。而入蜀。赴重慶。詣成都。跋雅

州出箭鏹。連龍安。踰棧道。徑忠州。度保寧。走劍州。越劍門。往還幾萬有餘里。皆不遇孝子。方倉皇無措。而遙望道旁柏林中。似有紺宇者。然溽暑行疲。姑往一憩云。至則真武宮也。守宮老僧雲參者。見孝子。乍問曰。客非江南人乎。曰然。曰非胡姓乎。孝子方愕曰。然。師烏從知之。雲參復曰。然則客非肖巖居士郎君乎。孝子大驚。泣下曰。然。然。今吾父安在。曰在。請孝子入。孝子隨雲參入。雲參故延孝子環視其室外內。指材木曰。此居士自備終制也。指土壠曰。此居士自為生塋也。壠上碑石。則保甯張太守所為居士題志者也。居士不復歸矣。郎君遠役良苦。如之何。如之何。孝子泣曰。楷求見父。惟師憐而導之。他非所知也。雲參乃徐曰。居士入幕中江縣廨。去此六百里。相見旦夕耳。幸勿苦。請止宿而後行。翼日。孝子辭雲參。行抵中江。例監君故無歸志。而又重難其子之遠迹也。方攜持慰諭間。孝子更出緘書十數次第以進。皆例監君親舊所貽者。于中張文學修能書。懇勸尤摯。例監君視之蹙然。孝子且長跪其側。泣涕求歸。而中江嘉侯感孝子之誠。復為之憇思不已。例監君乃稍稍心動。孝子遂奉以南歸云。當孝子之次重慶也。資用絕矣。進退維谷。適閩人賴君德安。行賈蜀中。與同逆旅。憐其孝。贈之白金十兩。孝子藉以供靡屨。往復徧兩蜀。竟得父耗。比發。自中江嘉侯率諸幕僚餞之江游。瀕登舟。例監君失足溺于江。川流駛激。孝子急恐不救。赴

水從之。適舟舵牽挽例監君衣得不溺。而孝子湛浮湍流。從舵旁得父。扶抱大呼。而中江亦趣使役從往拯。竟出其父子于水。以歸無恙。皆以為孝感所致也。既歸。越八載。例監君乃以天年終。而其母畢。今尚健在。詹善曰。先子昔受經于高平。與例監君兄弟為厚。暨孝子就傳。則與余後先同出魯齋鄭先生之門。族好世教。高平再世。用文學蜚聲。而孝子以篤行著。既雕既琢。復歸于樸。亢宗續古。孝子其勛之矣。

方君晞原權厝誌

吾友方君晞原。以乾隆五十四年七月廿有七日辛亥。疾卒于漢皋邸舍。越十月四日丙辰。輿柩東還。權厝于縣北陽峯里之原。其孤起泰等泣而請誌于余。嗚呼。吾忍誌吾晞原也。夫自余之交于晞原四十年所矣。曩者吾師朴山方先生來自淳安。主紫陽書院講席。余等執經門下。與晞原俱。于是乎始相識。先生旋返。彼此分攜。間一過從。然歲時率不數數。洎甲申乙酉之間。余在豐南。而晞原與汪子稚川。吳子惠川。及其弟箕浦。下帷于辛橋。乃獲晨夕焉。其後余館西干長慶寺。授徒之暇。晞原輒邀至其家。不則旬日過余。釐躬行之得失。證學詣之醇疵。往復流連。繼以規勸。雖臭味不啻也。先是晞原從張孝廉豹林遊。迄紫陽以往。轉益多師。于婺源則江微君慎修。于桐城則劉學博海峯。授受淵源。醇而不雜。加篤志嗜古。雖塵務旁午。酬應勢如。恆

手書一卷。炳燭呿晤。比漏下四十刻始息。如是者三十年。其為學自漢注唐疏。以洎宋五子之書。皆博涉徧觀。擇其善者。而不泥于一家。不詖于一說。嘗語余孔門而後。言絕義乖。儒流滅裂。然人道所以不終為鬼魅者。程朱之力也。吾儕博行實踐。師尊之不暇。而敢妄有瑕疵乎。又竊悼文章之敝。與余屈指數十年來。師亡道喪。傳述無人。不獨紫陽同門。零落殆盡。雖近歲辛橋二川。亦奄忽物化。宿草墓門。云誰興賢。而後生少年。苦無趣嚮。故所與接遇。其有志自樹。不說隨流俗者。必誘進而獎成之。諄諄懇懇。一如其親子弟然。所著道古齋初刻。其風律直埒安溪。而自然過之。然晞原未嘗以自是。又時時促余與共商榷。取前明定待。在閱諸選。擇其尤雅。綴緝成書。如文粹文鑑之例。畧存經義一綫。以待後之人。嗚呼。此晞原公誠之心。達乎疇類者也。晞原家世業漢皋。自其尊府藩理公時。經紀得所。有大以盈。俾晞原里居。為之繕祠宇。葺社壇。治嶺阪。平山蹊。且卜宅以妥其高尊累世之喪。未葬者。又以其餘波及族。姁久故。時其緩急。人得其意。聞見背負。亦度外置之。蓋其輕財而重義也如此。比歲以來。晞原自以年老子幼。鞭長弗及。屢欲取漢皋之業。休而息之。未果也。去年春。始成行。余往送諸其家。每更闌酒罷。并坐深談。委曲纏綿。未忍分割。余固疑此費別耳。何曉顧若是。雖晞原亦不自知其何以至是也。嗚呼。孰謂晞原之一去而不復返耶。

晞原將為起秦娶婦。有吉日矣。而晞原死。赴至。家人議從俗借吉。起秦泣曰。烏有執親之喪而沐浴佩玉者乎。聞之者皆泣。余亦泣而撫之曰。子若是而翁為不死矣。傳云。非此其身。在其子孫。余私度天之所以大晞原之後者。必將有在。而獨惜余之老而未及見其成也。晞原諱矩。靈山人。由恩貢生需次學博。學者稱為以齋先生。春秋六十有一。夫人豐南吳氏。如夫人汪江張氏。丈夫子二人。起秦也。長。其弟曰起謙。世系具晞原所為藩理公行述中。不備載。載其所學之醇。與其志之公且溥。而當世之不復有斯人為可哀也。

原命

張望

古之言命者。合天與人。先理而後氣。今之言命者。離人於天。任氣而遺理。嗚呼。何其言之悖而不可訓也。夫人。事有順逆。天命有治亂。理與氣不同立。治與亂故異命。自生民來。幾千萬歲矣。蔚之為事功。顯之為德行。古今益以日遠。天地久而長存者。天命常始。人事常因。人事常主。天命常輔。然而命不可以一日不治。則理不可以一日或屈。氣不可以一日使伸。何以明其然也。夫理猶君也。氣猶臣也。君有聖庸。臣有忠構。理得其衡。則氣效順。氣效順。則氣輔其理。而天命治。理失其衡。則氣侵權。氣侵權。則理役於氣。而天命亂。是故有治命。有亂命。有命將亂而復治者。有命將亂而人治之者。有命亂而人治之者。有命亂而不可復治者。治命者何。堯舜湯武之應迪吉。桀紂幽厲之從逆凶。是也。亂命者何。羿得。以篡夏。秦得以代周。咸陽之士無孑遺。長平之屍數十萬。是也。命將亂而復治者何。孔子畏於匡。圍於陳蔡。是也。命將亂而人治之者何。焚廬可以下。謨蓋可以出。微服可以遠。是也。命亂而人治之者何。少康之復。夏光武之興漢。是也。命亂而不可復治者何。跖修而回夭。牛疾而鯉亡。孔窮於魯。孟老於鄒。是也。夫前古天人之際如此。其大較也。故曰。人事有順逆。天命有治亂。理與氣不同立。治與亂故異命。吾以是歎聖人之立身也。聖人之事天也。奉天之治。遠天

之亂。不奉天之亂。違天之治。奉天之治。而得福為恆。違天之亂。而得福亦為恆。而有時皆爽焉。聖人不懼。奉天之亂。而得禍為恆。違天之治。而得禍亦為恆。而有時皆爽焉。聖人不為。故孔子曰。不知命。無以為君子也。子思子曰。君子居易以俟命。小人行險以徵幸。孟子曰。殀壽不貳。修身以俟之。所以立命也。又曰。知命者。不立乎巖牆之下。又曰。口之於味也。目之於色也。耳之於聲也。鼻之於臭也。四肢之於安佚也。性也。有命焉。君子不謂性也。仁之於父子也。義之於君臣也。禮之於賓主也。智之於賢者也。聖人之於天道也。命也。有性焉。君子不謂命也。然則自內者。盡人以符於天。自外者。進天而退乎人。夫乃真知天命矣。今也不然。庸庸以自好。沓沓以為事。愚者昏弱而不進。黠者貪汙以自賊。雖聞其愚。懲其黠。不憚告之以人理。彼且曰。有命焉。有命焉。則離人於天者矣。任氣而遺理者矣。離人於天。曾有事乎哉。任氣而遺理。不謂之亂命。可乎哉。惟昔聖人知生死之故也。審然莫知生之時。莫知死之日。及乎事已至。而效故違。然後歸之於天而已。不與。非徒釋衆疑。以堅為善而已。抑誠氣之加乎其理者。無可如何耳。未有忽其事。而任其命者也。有人於此。苟焉怠其事。而棄其生。不能衣食而凍餓。且死。豈命乎。如曰命也。前乎死者。將責其惰。與抑逆料其死。而姑不責與。設早自奮。以有衣食而不凍且餓。將憫其勤。與抑逆料其不死。而不用吾憫與。

於多行不義以取羣改而免者何以異。是嗚呼其可謂不思也已。其亦異於聖人也。已其真不知命也已。

茂才

天以降才。山川以鍾才。學以養才。或才而聖。或才而賢。才而曰茂者上也。才而止者次也。才而養者下也。夫才而養。書契以來有之矣。天也。山川也。學也。有所歸也。雖哉猶有却。今將鑄說以錮之。人肖天地其生也。造形噓氣於其父母。始生腎。腎有兩。左水。法天之一。右火。法地之二。天地人無水火不能成乎三才。腎以水為體。以火為用。其藏精興志。其主骨。精者腎之真氣也。易曰。精氣為物。言氣氣化生也。水之流行無遠弗至。志之象也。骨者水之凝也。是故饑之不得。渴之不竭。寒之不栗。暑之不煩。霜之不賴。霧之不迷。風之不撓。齒之不劫。血之不平。絕高不賴。險若坦夷。其內大充。其應無窮。若是者孰為之。精為之矣。是故其位置也自高。其待已也甚厚。其望世也實深。以悲乎天命。以閔乎人窮。母苟飽。母營居。家必孝。國必忠。如射者之中招。不中弗已。如御者之致遠。不致弗歇。若是者孰為之。志為之矣。是故擔君父之重。當四海之變。定傾側之危。冒嫌疑之際。持鎮靜之操。朝廷著其節。天下服其勇。若是者孰為之。骨為之矣。夫天地之水火在人身。用之經數十年。而飲食焉。男女焉。六淫焉。七情焉。

曲禮曰。三十壯。四十強。五十艾。六十耆。七十老。八十九十耄。素問曰。四十而衰。衰者腎之衰也。水衰則濕。火衰則焚。其正委權。其邪當棄。於是精衰則狂惑而喜忘矣。志衰則忤。歲以渴曰矣。骨衰則骭骹無堅直矣。人身也者。自無而之有也。三月而孩。不能精也。不能志也。不能骨也。始乎腎者。卒乎腎。此亦消氣歸根。自有而無之驗也。天之所降。山川之所鍾。及其衰也。天與山川不能扶。世之論才者。原始要終。雖或憾其不茂。而至於萎。方且返其父母之天。而冥芒莫之省也。夫惟聖人者。學以養之。聖人之才。與年加茂。聖人不能離乎飲食男女六淫七情。學焉而節之。憫之乎詩書之膏游之乎仁義之府。以葆其精。以磨其志。以申其骨。以扶其衰。有所不足。不敢不勉。終其身焉而已矣。故其事業功德。老而煥然愈彰。甚矣夫學者變化之神能也。

鄉治

天下之治。始乎縣。縣之治。本乎令。然而縣令成教化。一風俗。以聞於宰相天子。非其特立而孤行也。下有丞。又有尉。亦非丞與尉之輔而足也。此其故為縣令者。殆未有以明焉。朝廷垂意為縣矣。勤勤於必得其人。得人矣。又慮以一邑之大。民之衆。上與下不相屬。政令無與行。威惠無與徧。雖謹且廉。而其政不舉。於是里有長。鄉有約。族有正。擇其賢而才者授之。然後縣令之耳目股肱備也。縣令勤於上。約與正與長奉

於下。政令有與行矣。威患有與徧矣。族之人有一善。則其正勸之一族矣。里之人有一善。則其長勸之一里矣。鄉之人有一善。則其約勸之一鄉矣。有一不善。則斥之一族矣。斥之一里矣。斥之一鄉矣。既已如此。縣令於政理之暇。又時召見此三人者。面問百姓疾苦。人情嚮背。而以致吾政優優怡怡。勞來而益委重之。以樂乎其心。而警其怠。宣上之德意於民。民皆曰。上之愛民如此也。上之期我以君子善人如此也。吾日見鄉里風俗之美也。一鄉如此。他鄉可知也。一縣如此。他縣可知也。豈非鄉治而國治。國治而天下治乎。如或縣令不能奉承朝廷之意。以求化民成俗。至以苟且疏闊為事。族正既授以虛名。而不問鄉約。殆非所謂約也。里長殆非所謂長也。其小者理戶口。治館驛。大者剽掠殺人。必以告。一切奔走奴隸之而已。一不當則羣卒叫號於其家。而怒詈辱之於廷矣。而率其民以奉乎令者。固不責焉。況不選擇而使使之。又不以禮。則夫自愛者。固不肯為者。類鄉里無賴之人耳。借以生事。容奸賈禍於民。而陰享其利。且彼亦窺上之以無恥待也。衆之所謂下流而居之。雖欲潔清。不汙不得也。遂盡從而棄之。上之人又孰從而信之。不惟上之人不信而已。即以己之不善而教人善。以己之惡而謂人惡。平居說說其誰信而服之乎。不信不服。而鄉里之患不可言矣。訟獄盈庭。簿書矻矻。縣令日昃而不暇食焉。極於囹圄充塞。赭衣半道。

而不知誰之為之也。其亦疏而失其本哉。論鄉治。

知人難

知人難。何謂知人難。同其是而喜者情也。不同其是而怫者情也。有不同其是而無怫者。實有同其是而不喜者。今有兩人於此。其一人助我者也。同其是也。其一人撓我者也。不同其是也。助我者大都君子也。撓我者大都小人也。又有兩人於此。其一人撓我者也。不同其是也。其一人助我者也。同其是也。撓我者大都君子也。助我者大都小人也。是何也。彼之助我者。有利於事而已。彼之撓我者。勿便於己而已。此之撓我者。不利於事而已。此之助我者。求便於己而已。學成行專。名字大起。宰相知之。天子用之。顯要繫天下之望。朝廷不能有君子。無小人。不能使君子當事。而小人無為。於是乎同聲相應。同類相從。而助之者至矣。於是乎異臭相反。異色相亂。而撓之者至矣。此其固然。然而吾之心一耳。天下萬有也。人之賢不肖。事之成敗。利鈍。知之而豈盡無遺。其從而撓之者。開吾之智也。其因而助之者。蔽吾之明也。夫謂因而助之而蔽吾之明者何也。非其心之果是之。所以然者。求便於己而已。知其賢不肖矣。與其成敗利鈍矣。曹輩尚或沓默未同其是。而此一人已依依與歎同其是矣。出於非望矣。此豈其情哉。夫賢者快心快服。固自信固不疑人。方且假借地望。設吾道之

援究大事如此。贊王室如此。而孰知是人之非其情也。養爪銳為搏擊之資。洗垢求瑕。較吾道路。異時以敗大名。亦悔之矣。其小者。點名藥色。冒不知人之誚。其大者。妄生羽毛。禍人國家。古今亦何可支哉。故曰。知人難。

堅垂問

或曰。秦符堅不殺慕容垂。以垂之貳於堅。孰為是非與。則皆是與。抑皆非與。曰。堅之不殺垂。說者稱其有人君之度也。垂之貳於堅。說者原其有復燕之志也。則皆是也。而吾以為皆非也。初垂為太傅。評所不容。奔秦。先是秦王堅聞洛卒。陰有圖燕之志。憚垂不敢發。及聞垂至。大喜。郊迎執其手曰。天生賢傑。必相與共成大功。他日還鄉本邦。世封幽州。不亦美乎。以為冠軍將軍。明年秦滅燕。堅之寇晉也。大敗於肥水。以千餘騎馳赴。垂軍三萬獨全。或勸垂害堅。垂不從曰。吾昔為太傅所不容。置身無所。秦王以國士遇我。後復為王猛所賣。秦王獨能明之。此恩何可忘也。若瓜運必窮。吾當懷集關東。以復先業耳。悉以兵授堅。行至澠池。說言於堅曰。北鄙聞王師不利。輒相煽動。臣請奉詔書以鎮慰之。於是堅歸長安。垂趨安陽。會翟斌叛。堅驛書使垂討之。垂方修好於堅子長樂公丕。館之鄴西。已而相疑。而不且欲圖之。垂自鄴行至安陽。覺其謀。即叛秦與斌合。抵洛陽。稱尊號。復東如石門。濟河。長驅向鄴。石越討垂敗。

沒不遺姜讓譙之。垂曰：孤受主上不世之恩，故欲安全長樂公，使赴京師，然後修復舊業。於是遂上秦王堅表，圖鄴，自春徂秋，不拔，忽解而去，縱丕使西歸也。主燕祀者，垂之兄子曉，本邦固在也。滅燕而後，即何不以幽州相處？堅自謂收攬英雄，以清四海，而不知彼即特起細微，猶尚思南面而王。今垂以國易身，東望鄴墟，先人之宗廟悠悠何時能無哀嘯乎！條龍之間者，一聞肥水風，疾凌霄而去，雖其富貴秦養，羣臣致隙，始終而保全之，而滅國之怨毒深矣。堅在幸無事，一旦捐賓客而不立朝，養鷹之後，變為養虎，迨至澠池而歎有蘇張之事，猶為未矣。故曰：堅非也。於是君子為垂計，既以為秦冠軍將軍，而伏事於人矣，其來則自燕也。父就之所創業也，秦而加兵於燕，燕義則必亡。垂於此時，號涕為燕請命，身死妻子為僇，而無怨也。垂能存亡燕，秦能亡燕，而垂又能使秦不亡燕，懷其小存，忍其大喪，以俟吾他日之乘閒而自取之。故其縱史於加晉之兵矣。垂之攻鄴也，為復燕也，似也。淮南侍衛乘輿，淮北悉以兵授安全長樂公，使赴京師，是其本心。及解鄴圍，開丕西歸之路，以謝秦王，時昔之慰其報復亦畧相當。然而君父一也，復燕為就之孝子，不貳為堅之忠臣。國家方履禍，豐見利而不顧其君，故綱目謂之叛，是其託於秦以傳虎翼，以為異時裂地而王之本。淮南侍衛乘輿，淮北悉授兵安全長樂公，赴京師，解鄴圍，開其歸路，庶乎恭順。

者皆不足以贖之矣。向使秦舉兵攻燕。燕之將亡。垂計窮。逃竄久之。據有形便之地。聯落燕趙之衆。雷轟電飛。收還棄失。入鄴告廟。以示成功。甯不飄然偉丈夫哉。惜也。故曰垂非也。故曰堅垂皆非也。

送魏梅山歸龍津序

梧溪先生既亡之十有二年。梅山魏鳳閣。至自龍津。過棠城子。談者屢日。棠城子和唐風。梅山爲之序。已乃從棠城子聞予入城。訪予於學舍。童子炙菽煎茶。以奉梅山。未進。梅山慨然曰。鼎者遭梧溪於斯土。遽倖風好。相與恣其意於山水文章間。凡六閱月。今我來。則梧溪物故久矣。因泣下。遽起立戶外。頃之童子挑燈進茶。梅山索予文展卷一過。必中於其短。相得益謹甚。童子徐引退。不知也。夜沈沈然。益辨難不絕響。始梅山客棠城子。予在洪州。及是相見之日淺。而梅山則且歸矣。嗟夫。予其已於梅山乎。傾十三年以來者。送之。梧溪之西歸也。飲故人於汲翠樓上。當是時。微雨夜寒。松聲在戶。梧溪論天下事。眉宇軒軒然。已而酒酣客散。竊見送梅山序於几端。詫其爲人。梧溪指而謂曰。吾徒之選也。明年梧溪死。家藏書與所著詩。散亡畧盡。檢遺文至梅山序。想樓中對語之夜。不禁失聲哭。是後耳目所際。多親故傷心之事。往往一念梧溪。則梅山與偕至。抑又恨不見梅山。而梅山固不可猝見。思之十餘年。而一

旦至此殆天也。梅山之為人。梧溪固已序之。而梧溪之所不得見。則益進乎序之云。學該而文茂。語直而氣和。獨予貧不能主梅山。而梅山亦以故不得留。其可惜哉。於其行也。益思梧溪云。

盧大夫傳

盧公諱遠。字瑞芝。破石坪人。南唐尚書僉之裔。少貧薄不自餽。游寓江省。年五十一。賃傭糧道姚公署。陸陸無與為名姓。康熙十三年。叛將楊富餘黨稱白頭兵為亂。大兵駐省城。屬辦軍事。有功。明年募造戰船無應者。公列較中前身曰。某能。節帥由是奇之。於是洪東西州郡多陷。巡道李公副將吳公竝才公爭致麾下。十五年用公勦奉新流寇。擒之。旋從克復上高建昌安義靖安餘干鄱陽六縣。乘勝蹶賊於瑞州。是役也。公功為盛。授千戶長。是時洪城艮山民塗而載者數千人。悉倚公為命。還止其疆。十六年總督董公有撫州之戰。授明威將軍。尋攻江潯山。勦朱天錫。復銅鼓營。遷昭武將軍。十七年春。徇吉安贛州。大破賊秋興。廣信賊對壘。鏖戰凡五晝夜。克之。進取楊一豹。搗其巢。賊盡。江西平。公還省下。有故旅往來客候公曰。方賃傭時。不知君之至此也。脫冠見著。兜鍪處盡禿。然公年已老。而精力不衰。時時為氣如壯丈夫行者。黔滇告警。命總督某往討之。檄公偕。又慷慨騰馬脊行矣。己未春。大軍赴

雲南五月攻烟溪身先諸將夥斬獲入簡親王部勦紫陽河賊連大擒救出被寇四千四百餘人於是破黃茅嶺克靖州復鎮遠衛城駐平越府討馬寶防鴨池河謀渡無舟乃命士卒編竹為筏乘風直進賊望見膽落不戰走矣追至黔西而還雲貴初定而馬寶部方寇四川公語督帥往偵得其虛實乃捲甲而趨之拔其營隨畧隘口獲輜重器仗無算賊尋滅督帥上公功最乃班師壬戌還江西官拜左都督仍帶軍功二等管湖廣施州營遊擊事越五年晉階榮祿大夫贈曾祖祖父如公階年七十致仕歸卒年八十一葬新建畢家山公起行伍老乃得官出入輓轉於矢石間者近十年諸凡大小關未嘗敗北噫蓋其人豪哉

追葬驚渚阡

順治元年我師大破李自成於山海關自成棄京師西走明年夏餘黨寇南昌之武甯鄉民余公紹高禦之於牛頭峽敗死先是英王倡賊至九江後營總兵金聲桓請收江省自效王乃北旋已賊黨數千人從間道犯縣聲桓未入南昌而都御史曠昭懷鼠首仰郡息不得城陷縣官逃賊然公廩剽斬而去公本以匹夫雄猛有膽畧為鄉勇倡初偵賊旦夕至號於衆曰比覆祖宗三百年社稷國破君崩亡命走此再乘披猖願與公等甘心此賊一口應曰諾遂帥土團壁牛頭峽峽甚隘斷木為柵死守

賊不得進。首縣城下之。既而出不意反攻牛頭峽。躍關而入。公與衆人殊死戰。不克。遂遇害。是役也。死者相枕藉。賊焚掠聚餉村里為墟。由公而傳四世。而鳴珂始為諸生。聞公捐軀寇虐。亡骸無所。歲時寒食。曾不得子孫一杯飯。灑冢次。沓沓縣縣。游魂罔寄。必有飢愁冤憤而不克信者。於是公之死百三十年。為乾隆三十九年二月庚子。乃始制軀。范蒲為身。為位招魂。而葬之鷺渚。壙於辛丑。墳於壬寅。碑於阡以振厥烈。張望序其由。而文以弔之。其文曰。

嗟乎斯民。不幸當大亂之世。父不能保其子。夫不能保其妻。兄不能保其弟。一旦皆裂髮張奮。臂大躍。以築仇人之冑而死者。何可勝道。方其大盜撞唐四出。朝廷徵所在。雄兵貫將。暨方面以制其死命。而殘敗無主之餘。曳戈潰散。流亡邊鄙。鄉里無賴。桀黠。積延頸有隙。陸梁恣睢。以快其氣。又應乎郊屋之下。於是巖邑大都。當天下之要害。固已焦朽糜爛。而無遺。至於荒谷冷縣。舉豪傑所不爭。民生無外事。百年老死。不見兵革之憂。破敗立至。草薶而禽獮之怛怛然。孤兒寡婦之痛。徧百姓家矣。武甯僻在巖穴。當公之際。丁國家傾覆。預蒙四海之大難。及

聖人出而天下平。山中之民。安安而臥。由由而起。木石之與居。牛羊麋鹿之與遊。無由為壯門。夙戒雖啼狗吠之警。蓋已數世而百年。子若孫庇其庥澤。而當日之駢首

雖稱僅若蚍蜉蚽子之性命焉者。猶何人哉。予方欲詳二年之事。與公之生平。而歷世既遠。老成哀謝。而不可得。及覽縣志。而知與公同死事。有公之族尊大其人而已。嗚呼。其他姓名不可攷者。又不知幾千百尊大也。公憤不顧身。以殉一日之急。以此而死。亦以此而晦。百餘歲之後也。又卒以此發其光而傳。夫豈非千載之遇耶。而吾以徵賢烈之不可無後。而又嘆詩禮之澤之不可一日不灌於天下也久矣。

遊柯山記

吳高增

汎舟鑑湖之曲。弭棹容與。迤邐西南行。青嶽碧波。自相映發。漫流洄瀾。環山淪漣。鱗鱗清激。菰蘆蒲葦。紛披水濱。舟人曰。此柯水也。維纒登陸。攀蘿捫葛而上。苔磴峻嶒。竹生巖竇間。琅玕峻拔。益奇而堅。大抵柯山結體。巉巖骨立。雖無玲瓏洞壑。神剗鬼鑿之奇。而造物者之鎔冶。于翠螺參差秀矗中。別置一格。青鞋布襪。經歷陁坳。滿眼初平之羊。叱之不起。或蹲或偃。令人陟翫忘疲。灌莽中覓覽。勝亭故址。惟苔痕斑斑。類古梅作花。白照幽谷。或作青翠色。點綴荒寒。殊可人意。取徑而東。嵯峨石佛。準諸丈六金身。高且十倍。像教之說。本欲使震旦海衆。咸生信心。而彼徒詭譎務眩奇觀。其實化人無迹。初不須此。此妙相雖我輩雲表。視南明大佛。已縮小須彌矣。東巖石狀。皺法峭異。披麻劈斧。層疊軒豁。恨不得米襄陽滴蟾蜍水磨。隄磨一斗。潑寫之。猶故道回屐。忽松飈謾謾。潮簸林角。懸濤怒捲。似有留客意。下上嵌峯。思凍雨飛灑。一洗叢碧。雲收天霽。崖根皆見。當有清光可挹。或霜空曉晴。鏤琢冰雪。刻鏤稜竅。曠景初射。寒霧浮浮。必露青巖冷翠。惜乎不得如釣父樵叟之蕭閒。坐臥溪山。囊括其勝也。

棠樾鮑氏宣忠堂支譜序

曹文植

譜牒之義尚矣。先王大宗小宗之制。至秦有天下。而凌彝不講。由是世遠則弊渙。世繁則弊疏。不渙不疏。則又病乎龐雜而無紀。近代以來。藉以奠世繫。序昭穆。別嫌疑。定親疏。胥於譜是賴。宗譜水所匯。而支譜其衆流也。鮑氏為新安望族。其宗譜修明。閱有年矣。今棠樾官園學堅兩君。謂通者之未有紀也。支譜不立。將訂宗譜。曷據焉。於是別立一帙。遵舊譜例。以肇基棠樾者為始祖。而就其本支。乃條分而縷析焉。支各一譜。則萬人猶一身也。子孫繩繩。循例以續。則百代如一世也。其良法美意。吾固掄揚之。不能以已。而竊於鮑氏更有遐契也。歷觀古昔卿大夫。慮無不翼子孫計長久。以庶幾乎勿替也。然或一傳而其澤斬矣。或數傳而其族微矣。豈氣數之有盛衰歟。抑其根本之謀之未盡善歟。君子知卜世之道。不在勢之榮落。而係乎德之大小。不在家之肥瘠。而根其教之淺深。於是垂世作則。示之以仁義中正之途。諷之以忠孝節廉之事。而其子若孫。亦能奉先人之彝訓。而聰聽之。而恪守之。兢兢焉。思有以迪前光。而型後嗣。嗚呼。循斯道也。雖百世不敝可也。有明中葉。鮑思庵先生。官少司馬。致仕後。額私第曰宣忠。雖採制詰語。其所以教子孫者甚篤。今支譜即以命名。可見前以此顯。後以此承。家聲罔墜。豈顧問哉。又考棠樾為慈孝里。蓋其先有父子遇

寇相爭以死而卒相全者其務德殆家法使然歟今梓是譜者為吾友寅園寅園於城南書院捐巨貲為膏火其待疏逖者如此其篤宗盟可知也以吾所交者如此其族之懋厥德者諒亦猶是也是即其族寒微吾且卜其寢昌寢熾而況子姪叔行簪纓赫奕乎哉雖立譜也而他族之宗譜不是過矣嗚呼鮑氏之興甯有父乎

非園自記

屏余室岩山也曰茅山庚寅春余構小園於此高高下下因山勢而為之架木無多成功淺易娛老焉已矣故顏曰非園既乃仰而登俯而眺風景依然若有所觸則余五十年前之夢境也余為童子時夢遊於此山山有園額曰非園當是時山祇一部畧耳而今乃有樹有石有陂池有臺榭雖不足以窮勝覽而與前則大異矣天地間盈虛消息之變而事勢之無常固如是哉夫昔非園而今為園則曷為仍以非名之余謂昔日之非人所知也今日之非人所未必知也而不聞之乎莊周夢為蝴蝶相相然俄而覺遂遽然不知周之夢為蝴蝶抑蝶之夢為周歟而必執蝶曰蝶執周曰周不可謂達也余之踐斯夢而名之此物此志也是故樹不必古蕙蔥爾石不必奇余索爾陂池不必漫衍澹澹爾臺榭不必瑰麗亭亭爾有花則時之畦有蔬則種之圃寓意於物而不留意於物以是為非園也固宜然余即不若是而樹必古石必奇

設池必漫衍。臺榭必瑰麗。窮耳目之勝。殫土木之功。又可執以為園乎。夫昔之夢誠夢也。而亦知有覺而夢者乎。匪昔之幻而今之真。慎毋泥昔之非而今之是也。夫嗚呼。天下之一時稱盛而遷徙不常者。豈少哉。夫園其小焉者也。余因以自鑒。而並詔我後人焉。是為記。

遊黃山記

黃山距余家百三十里。而迄乾隆丁酉秋。遊具已備。而塵事糾紛。一羈十載。丁未春。請養歸里。程丈後村。知余有夙願。且途所已經。願為先導。定約於戊申七月偕往。乃及期而後村病不果行。復訂於今年七月。而旱熯殊甚。稻幾弗登。隨作毀約詩。致倦遊意。次日雨忽大沛。半月間得甘澍者數四。蘇枯振槁。猶獲過半。炎熯之氣亦頓釋。似山靈尚非我拒者。復以詩理前約。遂於七月二十四日戊申。隨伯兄發里門。天光澄霽。清風徐來。行四十里。至佛子嶺僧舍。後村已攜其族姪孫伯厚先至。晤時始知後村病。先是恐余知而中止。故諱言之。余乃力勸回車。且伯厚亦曾遊黃山者。先路之導。不必後村。而主誼諄篤。堅持不可。遂止宿焉。階下有木蓮一株。徑尺許。僧岸門云。此自黃山慈光寺移來者。其歲月已不可計。黃山中今僅慈光一株。此其二焉。餘無有也。往年皆四月生花。而樹杪忽放一枝。得未曾有。花分九瓣。與芙蓉相似。而較

小色白如玉。清香襲人。不知慈光一株亦能若是破格。生花否耶。次日己酉。月甫上而行。藍輿中略見峯影。盈耳皆潺潺聲。過容溪始放曉。不及訪容成臺。十餘里。踰山口嶺。嶺之北見雲門一峯。若天開闔闔然。再行過石碕嶺。黃土嶺。又二十里許至芳村。雲門之西巍然插霄漢者。天都峯也。又十餘里抵湯口。其居民善登陟。趨捷如猿。猱。遊黃山者。不啻以其人為輿為杖。乃招之而行。不數轉間。湧地嶢岬。喜且兼愕。路之犖确亦倍於前。下有溪。亂石縱橫。激流噴雪中。一泓溶溶泛碧。為百丈潭。過此約里許。至祥符寺。寺隔溪即湯池。舊名湯院。為黃山中精藍之最古者。溪流湍駛。易於泛溢。寺屢遭其厄。僅存數椽。司湯池者。則茅蓬之僧矣。時夕陽已在林杪。同人急渡板橋。北視湯泉。泉之上為紫石峯。峯之右為茅蓬。茅蓬創始於僧悟千。三傳而付鉢於今之戒嚴。皆能持戒律者。昔僅草屋半間。今已崇闋其殿。莊嚴其佛。居然稱名利也。寺額曰紫雲庵。其前松竹夾磴道。蒼翠蔽日。隔溪即雲門左支之山。勢頗峻。水簾洞。桃花源。青蓮宇。諸勝在焉。晚與戒嚴聽溪聲談遊政。娓娓不倦。夜分乃就寢。二十六日庚戌早起。天微作陰。飯罷下石磴。浴於湯泉。泉脈自沙中出。泛而上。若徑寸之珠。累累不絕。解衣浴之。見水面氣蒸蒸然。始微溫。少頃則漸熱。沙之質細而膩。可以拭身。盤礴既久。汗幾如雨。浴已覺暖氣沁毛骨。逾數刻弗散。嗅雙掌。則微香透鼻。觀

如蘭花將放時。真丹砂靈氣所氤氲而出也。午後復度板橋。尋桃花源故址。僅在彷彿間。青蓮宇則已莫得其處。水簾洞在上方兩峯之間。荆棘填塞。無徑可援。快快弗釋然。回視紫雲庵後諸峯。天都居其中。稍下為老人峯。朱砂峯。左則青鸞鉢。孟紫石。右則蓮蕊桃花芙蓉。拔地倚天。層青疊翠。英英白雲。猶復縈繚變滅於其間。如旛幢如羽葆。雖尚未窺閭奧而已。相與鼓掌咋舌。詫為奇觀矣。是夜後村病甚。二十七日辛亥。勸之先歸。至再至三。乃以主誼屬伯厚。始別去。辰刻招戒嚴弟子深雪偕行。拾危磴入叢木中。綠陰沈沈。肌骨皆冷。三里許。過得心亭。即慈光寺。昨所望紫雲庵後諸峯。環繞如屏障。中間廣場數十畝。仰羅峯秀。俯蹴雲光。福地天成。甲於吾郡。惜火劫頻仍。殿宇皆非舊觀。明神宗所錫金佛藏經。亦歸灰燼。今所存者。惟毘盧壇。金碧猶耀目。此外僅普門像一軸。金繡袈裟一領而已。問木蓮花已枯其半。雖較雲嶺者倍一圍。而色澤弗及。花時亦不繁。地之盛衰。此其徵也。由寺右行。取徑在天都朱砂二峯之間。鳥道一痕。磔硤嶮削。行數里。過飛來洞。又過觀音巖。僕夫無不作吳牛喘望朱砂峯。猶在天外。再上過龍翻石。延緣至老人峯側。則朱砂峯始在芒屨下。攀躋之難。至危且苦。而左右峯色。石之白者如脂。碧者如瑤。復間以屈曲之松。蒙茸之草。斷續之雲。目不暇接。故苦而甘。危而安也。老人峯者。其上有石如老人踞狀。坐其

下。望天都仍在天外。陡壁之半。有洞曰白猿洞。云有白猿居其中。莫知歲月。人亦不易得而見之。再上為天門。北乃陡壁。南一巨石。橫立如戶限。超絕萬峯之表。而以視天都。則甫及其半也。過此石。益奇。松益古。雲巢洞之南。有一字松。豈伏羲畫卦所遺。洞高二丈。深幾倍之。苔紋斑駁。傳色如繡。洞之北。磴道右折。復轉而左。見迎送松。一延客入。一讓客出。似為遊人作東道主。而迎者葉就黃落。雲液盡。尚望其潤。而復蘇。山靈庶幾呵護乎。再上為別有天。始得耕雲峯。自下望之。與天都合。故不見突兀之勢。亦凌太虛。而終遜天都數仞。又上為蒲團石。平廣容八九人。汲泉煮茗。環坐說安心偈。頗堪總倦足。茶罷。策杖而登。為臥龍洞。見臥龍松。橫臥石壁。約三丈許。壁既盡。松之首欲昂。然枝重則恐下垂。一石自絕壑突起而支之。松乃得盤青挽翠。結蓋而覆其石之頂。亦奇觀也。折而左。為小心坡。復折而右。為斷凡橋。度橋而上。兩石壁如斧削。仰望天光如窺窗隙。為一綫天。出壁得稍平處。坐而回望。則壁巔之石。各不相符。各銳其頂。或如劍之衝斗。或如戟之刺天。或如怪雲之米墜而凝。或如老樹之皮僵而立。松蟠其翠。鱗結其青。陸離奪目。問名曰蓬萊島。想三壺之秀。不過如斯。惜是時無雲。以作之海也。再上為文殊洞。洞腹如折。中亘巨石。不得上山。僧作木梯丈許。倚石側。人轉身緣梯。從石罅出。其上為小清涼。過小清涼。則文殊院矣。院倚玉屏。

峯左右兩石。俗以左為獅。右為象。然殊不相似。左右之外。天都卓爾。右石之外。蓮華
嫣然。其附於兩峯之外者。各層遞而下。如玉階千官。翼翼然就班拱侍。無少素者。院
之南為文殊臺。立臺上俯觀。則山山低伏。如几案。如兒孫。真上界清虛之府也。天既
暮。碧宇瑩澈。衆星皆下垂。北斗疑去。顛頂尺咫。其光可鑑。恍惚置身天上。而罡風颭
至。衣重裘。猶有寒色。凡骨支離。能無愧耶。二十八日壬子。仍止文殊院。不欲捨去。朝
旭已上十餘丈。霧忽作。始由遠山之坳。蓬蓬然起。繼則近山之坳。亦復如是。少頃。則
起於雲門。朱砂老人諸峯之麓。又起於天都蓮華之麓。及文殊臺之前。後左右矣。轉
瞬間。萬山齊隱。惟最高之峯。四五浮霧上。俄而此露其頂。彼沒其腰。俄而彼畢以紗
此施以障。僧滌雪云。當可得雲海觀。乃風作霧騰。不能成海。然溶溶漾漾。與臺埒平。
幾若一蹴可登者。不將起天際。真人之想乎。及午。霧乃散。由院之右。登立雪臺。觀後
海諸峯。逞異爭奇。又生幻相。坐良久。仍至文殊臺。視立雪臺南面峯石。高高下下。如
盼如顧。其間古松橫生側出。如經營位置。各得其宜。天然入畫之妙。恐荆關亦無能
著一筆。余向伯厚曰。人生但得此一壁。坐臥其下。可以終老也。二十九日癸丑。由文
殊院右循磴下。至轉身巖。境益險。偏不容肩。仄不容足。爰棄籃輿。憑大力者負以行。
二里許。值閭王壁。壁寬幾及二丈。彭亨具腹。兩旁皆無所倚。下視則冥冥然莫測其

深壁上鑿磴為三折。僅能置趾。倘一失足。輒墜無底之壑。乃負者視若平地。超距而下。技獨絕也。由壁往西北行。循蓮華峯之麓。為蓮華溝。溝盡即蓮華嶺。嶺介蓮華蓮蕊二峯之間。高三里。陡絕難緣。倍於慈光之躋天門。負者五憩乃上。復數折。伯厚指斜磴謂余曰。由此可登蓮華峯。特險絕耳。余曰。黃山之峯。惟蓮華與天都並。天都無路可攀。故不作登陟想。茲得路而弗登。是虛擲此遊也。仍犯險令負而行。初覺陡峻。猶不甚偏。忽一轉而下。臨無地。寬不盈尺。沙雜於石。復滑甚。令人豎毛髮。幸丈許旋入洞中。洞盡而險如前。又入一洞。如是者經四險。歷四洞而已。及峯十分之九矣。洞各銳末豐腹。其實或大或小。人似由藕節中行。緣本入巖。何造物者之狡獪也。登其巔。中有石如蓮蓓。四面各簇石片如蓮瓣。余坐蓓之上。平揖天都。近挹蓮蕊。環視前後海諸峯。皆出其下。是時日正午。天風不作。岫雲盡收。僧淩雪指西面天盡處。謂余曰。若為匡廬。若為九子。其白若一綫。縈繞而下趨者。則長江也。坐移時始下。過神龜靈鶴二石。下百步雲梯。自梯上窺之。似磴盡路斷。無措足地。而梯之寬近三尺。深且平。古松數株。夾梯立。身可倚。手可攀。梯既盡。羅徑一曲。即可通。人以為不寒而慄者。余過之灑如也。自此復循蓮華峯西麓。壁摩於肩。石觸於脛。作蟻附行。逶迤至鼇魚洞。洞口古柏一株。乃千餘年物。摩挲久之。始入。拾三十餘級而出。其上為鼇魚脊。地

漸平可以昇輿。由轉身巖至此。路極險。余無濟勝具。賴負者濟以所窮。其人曰程冬生。父名社子。昔北平朱竹君前輩來遊時。社子負之呼之曰海馬。自是遊人入山無不招海馬者。今社子已沒。而冬生克紹其能。余遂呼之為海馬駒云。由鼉魚脊行不
及一里。即天海。平廣足容萬人。舊有天海庵遺址已失。西望鍊丹臺。穹窿特起。臺之
西。則翠微丹霞上昇。軒轅鍊丹諸峯。攢刺削圭。森列獻秀。復二里。攀葛援藤。上光明
頂。頂居黃山中央。高稍遜於天都蓮華。而勢若鼎足。匡廬九子亦依稀可辨。其左陡
壁萬尋。自東而西。寬及數里。俯視之。怪石林立。巖壑閼。不可以數計。深雪曰。此散花
塢也。下光明頂。緣山腰側行。其下為光明藏雲際。雲外清潭。疊嶂諸峯。各數百仞。而
瓏玲皴瘿。如盆盎中物。五里許。至師子林寺。倚師子峯麓。左為清涼臺門。所對者乃
光明頂側出之山。其山獨化石為土。杉陰蔚會。草葉丹黃。羣峯之岵嶇。數峯皆隱而
不見。處曠乃奧。處高似卑。亦別創一格也。日已西。復往西海門觀落照。過飛來峯。一
石橫伏於下。一石高十丈。厚約十之三。立於橫石上。不相連附。其西猶虛出橫石數
尺。似狂飈一撲。即可墜者。鬼斧神工。恐亦束手矣。西海門者。飛龍引鍼。數峯居其左。
丹霞上昇。翠微數峯在其右。對峙巉峭。若門然。坐門側。見右數峯之背。陡壁從地起。
莫計尋丈。壁之半。萬石離壁而立。圓而蓋者。方而闌者。曲而防者。直而挺者。或上疊

下削或左凸右凹。欹乃弁之側。端為笏之擁。千狀萬態。丹青不能摹。猿獫不能陟。而松之碧。草之綠。映以返照之色。翠且兼紫。目晃神眩。惟令人狂叫歎絕而已。及暮。始旋宿於師子林。甫一更。而星斗忽沈。瓦溝淅淅作雨聲。竟夜未止。始知山高。易雲雲生。易雨。視塵界陰晴迥異也。八月初一日甲寅。天曉雨止。而霧氣瀰漫。一峯不見。登臨之勝索然。然寺前品字松。連理松。忽鬱綸困。左旋右紐。俯仰其間。盤桓已足。乃天意似憐遊者過寂。薄午霧忽散。俾登清涼臺。略窺石筍。砢諸勝。雖不逾時。滿濛復合。而已屬意外之得矣。初二日乙卯。晨興。天有欲霽意。飯罷。登清涼臺。下視石筍砢。萬峯叢立。程冬生擇其形似者。一一為余指名。盡態極妍。神詭意譎。舌橋幾不能下。復過師子峯石。觀破石松。松踞峯頂。自石腹中出。徑盈尺。幹石生而枝左向。幹高僅二尺許。其枝已盤旋盈石頂。不知石堅於松。抑松銳於石也。志載破石松。在一綫天。崇禎戊寅。已遭雷火。初未聞有此株。而山靈著意補之。為名嶽生色。安知擾龍蒲團棋枰數松。昔有而今無者。不且復生乎。下師子峯。復上黃花嶺。嶺半見始信峯。中裂千丈。上通以危橋。橋之西有松凝立。東伸一枝。若將引人臂而度者。即接引松也。伯兄停輿嶺頭。急招余曰。速來。至則遠近諸峯。出沒於白雲。離即之中。在坳者如堆絮。在巔者如覆雪。圓如鏡者為湖。長如帶者為江。其日色所照。作金色。而若濤若瀾者如

黃河雖未能作海觀。然具體而微。已足償我夙願。久之雲忽升。似將雨。不及登始信峯。為茲遊一恨。遂過始信峯。為平天砭。砭之麓。則步步下行。右即散花塢之北面。一峯橫數石。一石攢數松。無凡狀。亦無合相。左則石門峯。石柱峯。巍然卓傑。端立不舉。其時雲氣忽濃忽淡。乍合乍分。音樂鳥遠。調喉嚨。舌於迷離縹緲間。為笙簧。為蕭管。停輿聽之。如鈞天廣樂。聞所未聞。再下則經石人指路峯。峯不甚高。其上有石人。寬衣博帶。面向入山磴道。作以手代語狀。余謂伯厚曰。天下惟鐵石心腸者。始能多情。此宋廣平所以有梅花賦也。行數里。道旁有雪莊。悟和尚塢。雪莊通禪悟。精詩畫。結茅近散花塢。曰皮蓬。一時名賢高士。樂從之遊。今皮蓬荒圯。遊人不復過問。非有心者。安知此塢。生滅何常。於斯可悟。塢之右為白沙砭。砭盡為白沙嶺。自師子林至此路之險仄。亦同前海。而行者不病。以猶得一面依山耳。嶺之麓。緣溪取徑。漸覺平行。行五里。至雲谷寺。環寺之山。不復有石。九龍峯峙其前。尤娟秀。可挹松竹森森。淵流瀲灩。亦選佛勝場。寺之宏敞。次慈光。而整肅過之。由寺而南。過步雲亭。里許。經仙人榜。再里許。經開門石。又二里許。則九龍峯在隔溪上。溪繞峯委折而下。值陡壁。即成瀑布。壁分四層。瀑亦四折。層各有潭。潭各有多寡。合而計之。則九潭焉。瀑之色白。潭之色碧。錯出浮光。潏潏照巖谷。蓋與由隔山行。注視傾聽。頗盡其妙。夫黃山之勝。無

奇不備。惟水之勢微。不可無此瀑以補其缺也。過潭五里。至覺庵。乃雲谷下院。秋割方興。盈地新穀。不可以居。仍由湯口歸紫雲庵。戒公迎余曰。黃山在公囊中乎。余曰。黃山以雲以松以石勝。人盡得而知之。一片之雲有異勢。一尺之松無凡枝。人亦得而言之。至於石之何以勝。人尚未得而罄言之也。萬仞之峯。不若寸膚。奇矣。而萬仞之峯。以億萬之石。橫撐豎插。隨其大小。任其欹斜。層累而成。參錯而合。罅不妨漏。縫不必彌。以生松。以茁草。草以花。松以黛。使峯若繪。若繡。非奇中之奇者乎。石之肖形者。若大士。若達摩。若阿羅漢。若老子。若飛仙。若神女。若宰官。若武士。若爐。若幢。若餅。若椽。若樺。若燭。若師。若龜。若鶴。若猿。若松鼠。若蟾蜍。一一指而言之。神似矣。然易一面即易一形。參一峯又現一相。其林林壘壘。有一石皆可以名一物。而執一物不足以盡一石。且雲之根以石。石幻而雲亦幻。松之骨以石。石勁而松亦勁。黃山中凡雲與松之奇。皆石之奇。有以胚胎之鼓動之也。難名也。戒公撫掌曰。聆公言。可為石慶得知已矣。是夕聞後村病漸瘳。喜甚。然後村若非曾遊黃山者。自崖而返。必以為恨。而余積願於十三年之前。始無後村約。既不果。繼得後村約。復不果。此遊也。非天之沛然雨。非後村之諱言病。又幾裹足不前。余感玉成者天。汲引者後村也。初三日丙辰。辭戒公。澡雪出山。迂道行七十里。宿茗嶺僧舍。初四日丁巳。復行七十里。過西干。

回望天都蓮華雲門數峯依依如故人然不敢久視恐山靈笑余又落塵界也與伯厚別乃徑歸